



2021-5

3. november 2021

All. nr./notatnr.:

2020-145-0001-23

Sull./sagsbeh.: CL/jh

Sulianik meeqqat pingasut inissinneqarnerinut angerlartinneqarnerinullu tunngasunik suliarinninneq akuerineqarsinnaanngilluinnartoq

Angajoqqaat aappariit meeraat sisamat meeqqat ilaata ataatsip kinguaassiuutitigut killisanik qaangiiffiqineqarsimaneranik pasitsaassineq pissutigalugu nukinginnartumik inissinneqassasut Avannaata Kommunia (matuma kingornatigut kommunimik taaneqartartussa) 2018-imi oktoberimi aalajangiivoq. Aalajangiineq angajoqqaat aappariit akuersitinnagit pivoq.

Inissiineq ingerlaannassasoq kommuni 2018-imi decemberimi aalajangiivoq. Aamma aalajangiineq taanna angajoqqaat aappariit akuersitinnagit pivoq. Kinguaassiuutitigut killissanik qaangiiffiginnissimaneq pillugu suliamik misissuineq politiit tamatuma kingunitsiannuatigut unitsippaat, kommunilu tamatuminnga nalunaarfigineqarluni. Meeqqat pingasut inissinneqarnerat kommunip nutaamik aalajangiinani ingerlatiinnarpaa.

Angajoqqaat aappariit sulianik meeqqamik inissinneqarnerinut angerlartinneqarnerinullu tunngasunik suliarinninneq Ombudsmandimut 2020-mi februarimi aamma 2020-mi oktoberimi naammagittaalliuutigaat, misissuinerlu taassuma aallartippaa.

Ombudsmandi isumaqarpoq kommunip sulianik suliarinnnnera akuerineqarsinnaanngilluinnartoq, kommunilu angajoqqaat aappariit meeraasa inissinneqarneri angerlartinneqarnerilu pillugit suliani amerlasoorpassuarnik, annertooru-jussuarnik ilungersunartorujussuarnillu kukkussuteqartarsimasoq.

Tamatuma Ombudsmandip paasinninnera unaavoq:

- *kommunip politiit D-p kinguaassiuutitigut killissanik qaangiiffigineqarsimanageranik pasitsaassineq pillugu suliamik misissuineramik unitsitsisimanerannik paasissutissamik 2018-imi decemberimi tigusaqarnermi kingornatigut angajoqqaat aappariit meeraasa angerlarsimaffiup avataani inissisimaneqaannarnissaannut angerlartinneqarnissaannulluunniit tunngavissaqarner-soq isummerfigisimasariaqarluaraa, meeqqallu inissinneqarsimanagerat aalajangiusimaneqassasoq imaluunniit meeqqat angerlartinneqassasut aalajangiisimasariaqaraluarluni,*
- *kommunip aalajangiinerinut tunngavilersuutit amigaatilerujussuusut,*
- *kommuni inissiinissamik angerlartitsinissamillu aalajangiinermini naammagittaalliornissamut periarfissaq pillugu kukkusumik erseqqarluttumilluunniit ilitersuisarsimasoq,*
- *kommuni suliap kommunimi suliareqqitassanngortillugu utertinneqarnissaanik Naammagittaalliuuteqartarfiup 2019-imi januarimi aalajangiinera-ta kingornatigut nutaamik aalajangiiniaasaarpallaarsimasoq,*
- *kommunip inissiisoqarnissaanik aalajangiineri angajoqqaanut aappariinnut tamanut meeqqanut angajoqqaatut oqartussaassusermik tigummiaraqartuusunut nalunaarutigineqartussaasimasut,*
- *angerlartitsinissamik qinnutigisaq allakkatigut tunniunneqassasoq kommunip piumasaqaatigisinnaanngikkaa, kommunilu angajoqqaat aappariit meeqqatik angerlartikkumallugit kissaatigigitsik oqaasiinnartigut saqqummiussaat tunngavigalugit iliuuseqarsimasariaqaraluartoq,*
- *piffissap angajoqqaat aappariit angerlartitsinissamik qinnutigisaannik suliarinninnerminut kommunip atugaa sivisuallaarujussuartoq,*

- *kommuni angajoqqaat aappariit meeraasa angerlartinneqarnissaannik suliat suliarineqarneranni suliani allagaatit kommunimut nuuffigineqartumut tamatuma peqatigisaanik nassiunnagit angajoqqaat aappariit illoqarfimmut allamut nuussimanagerat tunngavilersuutigalugu unitsitsigami ilungersunartunik kukkussuteqarsimasoq.*

Ombudsmandi suliani annertunerusumik kukkussuteqartoqarlunilu sumiginnaasoqarsimasoq isumaqarami oqaaseqaatini pillugu Inatsisartut Inatsisinut Ataatsimiititaliaannut kommunalbestyrelsimullu Ombudsmandi pillugu inatsimmi § 23 tunngavigalugu nalunaaruteqarpoq.

(Oqaaseqaat 3. november 2021-meersoq, j.nr. 2020-145-0001)

Suliami pineqartut kikkussusiinik ilisarnarunnaarsaanermi taaguutit makku atorineqarput:

A: Anaanaq

B: Ataataaq

C. Meeraq 1

D: Meeraq 2

E: Meeraq 3

F: Meeraq 4

Illoqarfik X: Avannaata Kommuniani illoqarfik

Illoqarfik Y: Kommuneqarfik Sermersuumi illoqarfik

Ombudsmandip oqaaseqaataa:

1. Suut misissorpakka?

1.1. A-p B-llu meeqqamik angerlarsimaffimmik avataanut Avannaata Kommunianit (matuma kingornatigut kommunimik taaneqartartussamit) 25. oktober 2018-imi inissinneqarsimanagerat kommunillu inissiinernik tamatuma kingornatigut aalajangiusimanninnera aamma meeqqanik angerlartitsisinnaasimanginnertik uannut 3. februar 2020-mi naammagittaalliuutigaat.

Kommunip meeqqat angerlartinniarneqarnerat pillugu sulianik suliarinninnermi-
nik unitsitsisimanera A-p B-llu uannut allakkatigut 1. oktober 2020-meersutigut
naammagittaalliuutigaat.

A-p B-llu meeraasa angerlarsimaffimmik avataanut inissinneqarnerannut tamatu-
malu kingornatigut angajoqqaat aappariit meeqqatik angerlartikkumallugit qin-
nuteqarnerannut atatillugu kommunip suliamik suliarinninnera misissorniarlugu
A-p aamma B-p uannut saaffiginnissutaat tunngavigalugit aalajangerpunga.

Misissuininnut atatillugu tamatuma saniatigut kommunip sulianik A-p B-llu mee-
raasa inissinneqarnerinut angerlartinniarneqarnerinullu tunngasunik suliarinnin-
nerani pissutsit allat arlallit nammineerluni misissuiffiginninnermik aallartitsivigi-
niarlugit aalajangerpunga.

Inatsisartut Ombudsmandiat pillugu Inatsisartut inatsisaanni nr. 7-imi, 1. juni
2017-imeersumi § 15, imm. 1 innersuussutigaaara, tassuunalu aalajangersarne-
qarpoq Ombudsmandi suliamik nammineerluni misissuiffiginnilersinnaasoq.

Nammineerluni misissuiffiginninnermik aallartitsiniarlunga aalajangerpunga,
naak A-p B-llu kommunip inissiinissamik aalajangiinerinik 25. oktober 2018-i-
meersumik aamma 12. juli 2019-imeersumik kiisalu kommunip angerlartitsiniar-
nermik itigartitsoqarnissaanik aalajangiineranik 18. juli 2020-meersumik Isuma-
ginninnermi Naammagittaalliuuteqartarfimmut (matuma kingornatigut Naamma-
gittaalliuuteqartarfimmik taaneqartartussamut) naammagittaalliuutiginninnissa-
minnut periarfissaminnik atuisimanngikkaluartut. Tamatumani aalajangiinerit
Naammagittaalliuuteqartarfimmut naammagittaalliuutigineqarnissaannut piffis-
saliussap qaangerneqarujussuareersimanera suliallu kukkunernik amerlasoor-
passuarnik, annertoorujussuarnik ilungersunartunillu imaqarnerat pingaartillugu
isiginiarpara.

Kommunip suliamik suliarinninneranik misissuininni qulequttat oqaaseqaammi
matumani oqaatigineqarneri malillugit samminiarlugit aalajangerpunga:

Inissiineq

- kommuni aalajangiinerit ingerlatiinnarneqarnissaannut suli tunngavissaqarnersoq imaluunniit kommunip meeqqat paasissutissanik nutaanik politiinit tigusaqarnerata kingornatigut angerlartinneqassanersut aalajangiisimasariaqaraluarnersoc (immikkoortumi 3.1-imi),
- kommunip angerlarsimaffiup avataanut inissiinissamik aalajangiineri tunngavilersuummik naammattumik naammagittaalliornissamullu perisarfissaq pillugu ilitsersuummik eqqortumik imaqarnerisut (immikkoortumi 3.2-mi),
- kommuni Naammagittaalliuuteqartarfiup suliamik angerlarsimaffiup avataanut inissiinermut tunngasumik kommunimut suliareqqitassanngortitsilluni u-tertitsinerata kingornatigut sulianik pisariaqarneratut pilertortigisumik suliarinissimanersoc nutaanillu aalajangiisimanersoc (immikkoortumi 3.3-mi),
- kommunip akuersisitsinani angerlarsimaffiup avataanut inissiinerit pillugit aalajangiinerit angajoqqaatut oqartussaassusermik tigummiaqartunut eqqortumik nalunaarutigisimanerai (immikkoortumi 3.4-mi).

Angerlartitsineq

- angerlartitsiumalluni qinnutigisac allakkatigoortinneqassasoc kommunip piomasaaqatigisinnaaneraa (immikkoortumi 4.1-imi),
- meeqqanik angerlartitsiumalluni qinnutigisac kommunip pisariaqarneratut pilertortigisumik suliarisimaneraa (immikkoortumi 4.2-mi).

Suliap suliarineqarneranik unitsitsineq

- kommunip suliamik angerlartitsiniarnermut tunngasumik suliarininnermik angajoqqaatut oqartussaassusermik tigummiaqartut kommunimut allamut nuussimanerat tunngavilersuutigalugu unitsitsisinnaanersoc (immikkoortumi 5.1-imi).

1.2. Eqqortussac anguniarlugu oqaatigaara sulianik misissuininnut atatillugu qu-laani taaneqartut kisiisa isummerfigisimagikka. Tassa imaappoc ilaatigut makku isummerfiginngikkikka:

- kommuni A-p B-llu meerai sisamat angerlarsimaffimmik avataanut inissinneqassasut 25. oktober 2018-imi aalajangiisimasoc tamatumalu kingornatigut

inissiinerit ingerlatiinnarneqassasut 6. december 2018-imi aamma 12. juli 2019-imi aalajangiisimasoq ilumoornerisq,

- A-p B-llu paniisa angerlartinneqarnissaat itigartitsissutigalugu kommuni 18. juli 2020-mi aalajangiisimasoq itigartitsinerlu nalunaarutigisimagaa ilumoornerisq.

Oqaatigaara taamatut naliliisoqassappat perorsaanikkut isumaginninnikkullu suliani apeqqutinik arlalinnik isummerfiginninnissaq piunasaqaataasoq. Uanga Ombudsmanditut apeqqutinik taamaattunik naliliiviginnissinnaanissannut suliatigut ilisimasanik pisariaqartunik peqanngilanga.

1.3. Oqaaseqaatinni Danmarkimi atuakkiaasimasut arlalitsigut aallaavigisarpakka, tassami immikkoortuni taakkunani Kalaallit Nunaanni inatsiseqartitsinikkut tunngaviup Danmarkimi inatsiseqartitsinikkut tunngavik pingaernerpaatigut assigimmagu, tamannalu innersuussutinit taaneqartunit erserpoq.

Oqaatigaara suliamik suliarinninninni malugigiga kommunip aalajangiinerisa 6. december 2018-imeersup aamma 12. juli 2019-imeersup qallunaatuui kalaallisuulu assigiingissuteqartut. Kalaallisuup qallunaatuullu assigiingissuteqarnerat paasigaangakku qallunaatuuanut nutsernerani kipparissunik ungaluuserlugu allattarpara.

Siullermik suliap ingerlasimaneranik uanga paasinninnera tulliuttuni allaaseraara (immikkortumi 2-mi).

Tulleriinneri malillugit inissiineq (immikkoortumi 3-mi), angerlartitsiniarneq (immikkoortumi 4-mi) aamma suliap angerlartitsiniarnermut tunngasup suliarineqarneranik unitsitsineq (immikkoortumi 5-imi) pillugit apeqqutit assigiingitsut misissuinerma saqqummersitai immikkoortillugit sammivakka. Inatsiseqartitsinikkut tunngavik, suliap ingerlasimaneranik paasinninnera, kommunip suliamik paasinninnera kiisalu uanga naliliinera pillugit tassani nassuiaateqarpunga.

Naggasiutigalugu kommunip suliamik apeqqutit misissorniarlugit aalajangius-sakka eqqarsaatigalugit suliarinninneranik ataatsimut naliliiviginnippunga (im-mikkoortumi 6-imi).

Suliap ingerlasimaneranik allaaserinninneq oqaaseqaatinnut tulliuvoq.

2. Suliap ingerlasimaneranik uanga paasinninnera

Suliaq imatut paasivara kommunip illoqarfimmi X-imi isumaginninnermik inger-latsivia ataatsimiititaliap siulittaasuata aalajangiinerata kingornatigut 25. oktober 2018-imi A-p B-llu meeraat angajoqqaat aappariit akuersitinnagit angerlarsimaffiup avataanut nukinginnartumik inissineqassasut aalajangiigallarsimasoq. Aalajangiineq meeqqat tapersorsorneqarnissaannut Inatsisartut inatsisaanni § 28, imm. 2 tunngavigalugu pisimavoq. Inissiinermut tunngaviusoq tassaavoq angajoqqaat aappariit paniata angajulliup D-p kinguaassiuutitigut atornerlunneqarsimasinnaaneranik pasitsaassineq. Meeqqallu suliap politiinit sukumiinerusumik misissorneqarnerani illersorniarlugit inissineqarsimapput.

Meeraq sorleq angerlarsimaffiup avataanut nukinginnartumik inissiinissamik aalajangiinermi pineqarnerisooq kommunip aalajangiinerani 25. oktober 2018-imeer-sumi takuneqarsinnaanngilaq, tunngaviutipparali aalajangiineq angajoqqaat aappariit meeraannut sisamanut, tassalu D-mut, F-imut, E-mut aamma C-mut tunngasuusoq.

D-p kinguaassiuutitigut atornerlunneqarsimanani politiini video atorlugu apersuinnermi 4. december 2018-imi oqaatigaa. Tamanna illoqarfimmi X-imi isumaginninnermik ingerlatsivimmi sulisup sulisuma ilaannut oqarasuaatikkut 21. februar 2020-mi paasissutissiissutigaa.

A-p B-llu meeraat D, F, E aamma C angajoqqaat aappariit akuersitinnagit angerlarsimaffimmik avataani inissisimaannassasut kommunimi ilaqutariinnermut ataatsimiititaliaq 5. december 2018-imi ataatsimiinnermi aalajangiivoq. Aalajangiineq meeqqanik tapersersuisarneq pillugu inatsimmi § 28, imm. 2 tunngavigalugu pisimavoq. Kommunip aalajangiinera A-mut allakkatigut 6. decem-

ber 2018-imeersutigut nalunaarutigineqarpoq. Taamaattumik aalajangiineq 6. december 2018-imeersoq tulliuuttuni innersuussutigisarpara.

Politiit B-mut allakkatigut 7. december 2018-imeersutigut nalunaaruteqarput D-p kinguaassiuutitigut killissanik qaangiiffigineqarsimasinnaanerani pasitsaassineq pillugu suliamik misissuineq politiit unitsikkaat. Kommunip tamanna pillugu paasissutissaq ulloq 13. december 2018-imi tiguaa.

Uanga paasinninnera unaavoq A-p B-llu ernerat C politiit suliamik qulaani taaneqartumik misissuinerannik unitsitsinerup kingornatigut angerlartinneqarsimasoq. Taamaattoqarsimappalli tamatuma qanga pisimanagera suliami allagaatini kommunimit tigusanni takuneqarsinnaanngilaq.

D-p, F-ip E-llu angerlarsimaffimmik avataanut inissinneqarnissaannik akuersinerminnut uppersaat A-p B-llu 14. december 2018-imi atsiorpaat.

Kommunip aalajangiinera 6. december 2018-imeersoq A-p B-llu Naammagittaalliuteqartarfimmut 27. december 2018-imi naammagittaalliutigaat. Naammagittaalliuteqartarfimmut naammagittaalliummit erserpoq meeqqat angerlarsimaffimmik avataanut inissinneqarnersimanagerat, angajoqqaallu aappariit meeqqaminnik najueqatiginninnissaminnut mattunneqarnertik A-p B-llu iluarinngikkaat.

A-p B-llu Naammagittaalliuteqartarfimmut naammagittaalliutaannit aammataaq erserpoq angajoqqaat aappariit meeraat illoqarfimmut allamut ilimasaarutigeqqaarnagu 15. december 2018-imi aallartinneqarsimasut, meeqqallu angajoqqaat aappariit imigassartorpallaarnerat pissutigalugu pinngitsaaliinikkut masakkut peersinneqartut angajoqqaanut aappariinnut oqaasiinnartigut paasissutissiissutigineqarsimasoq.

Suliaq inissiinermut tunngasoq kommunip nutaamik suliareqqissagaa nutaamillu aalajangiissasoq Naammagittaalliuteqartarfik 23. januar 2019-imi aalajangiivoq.

Naammagittaalliuuteqartarfiup aalajangiineranit erserpoq A-p B-llu meeraat angerlartinneqarsinnaanersut imaluunniit kommunip meeqqanik taamani inissii-gami angajoqqaat aappariit akuersitillugit taamaalorsimappat akuersisitsinani inissiisoqassanersoq kommunip isummerfigissagaa.

Kommunimi ilaqutariinnermut ataatsimiititaliaq 14. juni 2019-imi aalajangiivoq A-p B-llu panii D, F aamma E angerlarsimaffimmik avataanut nukingiullugu inissinneqassasut. Kommunip aalajangiinerani meeqqanik tapersersuisarnej pillugu inatsimmi § 28, imm. 2 innersuussutigineqarmat tunngaviutippara A aamma B akuersitinnagit inissiisoqaqqittoq.

Kommunip aalajangiinera 14. juni 2019-imeersoq A-mut allakkatigut 12. juli 2019-imeersutigut nalunaarutigineqarpoq. Kommunip aalajangiinera angajoqqaanut aappariinnut A-mut allakkat 12. juli 2019-imeersut sioqqullugit oqaasiin-nartigut nalunaarutigineqarsimanersoq suliame allagaatini takuneqarsinnaanngi-laq. Taamaattumik aalajangiineq 12. juli 2019-imeersoq tulliuttuni innersuussuti-gisarpara.

Imatut paasivara A aamma B 2019-imi juullimi sulinggiffeqarnermi decemberimi illoqarfimmut Y-liarsimasut. Illoqarfimmut X-imut 30. december 2019-imi uter-tussaasimagaluarput, meeqqatilli najorusullugit illoqarfimmi Y-miiginnarniarlutik aalajangersimallutik.

Kommunip angajoqqaat aappariit meeraannik angerlarsimaffiup avataanut 25. oktober 2018-imi inissiisimanagera inissiiinernillu tamatuma kingornatigut aalaja-ngiusimannissimanagera aamma meeqqaminnik angerlartitsisinnaasimanngin-ner-tik A-p B-llu 3. februar 2020-mi uannut naammagittaalliuutigaat.

A-p B-llu naammagittaalliuutaat kommunimut ingerlateqqillugu allakkatigut 4. marts 2020-meersutigut nassiuppara, kommunimi suliarisassanngortillugu aki-sassanngortillugulu, kommunimullu tamatumunnga peqatigitillugu oqaatigalugu angerlartitsiniarneq pillugu naammagittaalliuut angajoqqaat aappariit panimmik angerlartinneqarnissaannik qinnuteqaataattut (qinnutigisaattut) isigigiga.

Kommuni A-p B-llu D-p F-ip E-llu angerlartinneqarnissaannik qinnuteqaataat (qinnutigisaat) itigartillugu 18. juli 2020-mi aalajangiivoq.

Kommunip panimmik angerlartinneqarnissaannik qinnuteqaatertik pillugu suliat suliarineqarnerannik ilaatigut unitsitsinera A-p B-llu uannut 1. oktober 2020-mi naammagittaalliuutigaat. Kommunip angajoqqaat aappariit aalajangersimasumik najugaqarfeqannginnerat illoqarfimmilu Y-miinnerat innersuussutigisimavaa.

Kommuni A-p B-llu najugaqarfittut nalunaarsorsimaffiata Kommuneqarfik Sermersuumut allangortinneqarnissaa pillugu ulloq 18. marts 2021-mi aalajangiivoq, aalajangigarlu Kommuneqarfik Sermersuumut nassiullugu, najugaqarfillu eqqortoq ullorlu nuuffissaq nassaariniaqqullugit Kommuneqarfik Sermersooq qinnuigalugu.

Meeqqamik inissinneqarnissaat il.il. pillugit suliani allagaatit A-mut B-mullu attuumassutillit tamaasa kommunip ulloq 23. marts 2021-mi Kommuneqarfik Sermersuumut nassiuppai.

Kommuneqarfik Sermersuup suliami allagaatit kommunimut 23. marts 2021-mi utertippai, A-p B-llu illoqarfimmi X-imi najugaqarnerat innersuussutigalugu.

3. Inissiineq

3.1. Kommunip suliamik paasissutissanik nutaanik politiinit tigusaqarnermi kingornatigut suliarinninnera

3.1.1. Inatsiseqartitsinikkut tunngavigisaq

3.1.1.1. Meeqqanik inuusuttunillu angerlarsimaffiup avataanut inissiisarneq ilaatigut meeqqanik tapersersuisarneq pillugu inatsit tunngavigalugu aalajangersaavigineqarpoq.

Kommunalbestyrelsi meeqqat tapersersorneqarnissaannik ilaatigut aalajangiisinaavoq, matumani angerlarsimaffiup avataanut inissiisoqarnissaannik aalajangi-

neq ilanngullugu eqqarsaatigalugu. Tamanna meeqqanik tapersersuisarnek pillugu inatsimmi § 5, nr. 1-ikkut aalajangersarneqarpoq.

Meeqqanik angerlarsimaffiup avataanut iniissiinerit pillugit suliat nukinginnartut meeqqap massakkorpiaq pisariaqartitai eqqarsaatigalugit kommunalbestyrelsip nalinginnaasumik pilersaarutaasumillu ataatsimiinnerinut utaqqisinneqarsinnaanngitsut ataatsimiinnerit akornanni allatut iliorluni suliarineqartussaapput. Ingerlatsiviup nukinginnartumik iniissiisoqarnissaanik aalajangiineri kommunalbestyrelsimut ilisimatitsissutigineqartussaapput. Tamanna meeqqanik tapersersuisarnek pillugu inatsimmi § 6, imm. 1-ikkut 2-kkullu imaattunik oqaasertaqartutigut aalajangersarneqarpoq:

“**§ 6.** Nukiginnartumik meeqqamik inissiinissamik aalajangiinissaq, meeqqat pinartumik pisariaqartitsinerat pissutigalugu kommunalbestyrelsimut suliarineqarnissaa utaqqinneqarsinnaanngippat, aalajangiingallarnek kommunimi meeqqanik sulianik ingerlatsinermut oqartussaasoqarfimmi pisinnaavoq.

Imm. 2. Imm. 1 malillugu ikiorsiinerimik aalajangigaq unereersimassagaluarpalluunniit kommunalbestyrelsip ataatsimiinnerani tullermi ilisimatitsissutigineqassaaq.”

Kommunalbestyrelsip ingerlatsivimmi suliat nukinginnartut pillugit aalajangiinerinik ilisimatinneqartuarnissaa meeqqanik tapersersuisarnek pillugu inatsimmi § 6, imm. 2-p qulakkiissavaa, taamaalilluni kommunalbestyrelsi kommunimi suliat nukinginnartut qassiussusiinik, suussusiinik il.il. ilisimasaqartuarsinnaaqqullugu. Tamanna aalajangersagaq taanna pillugu immikkut oqaaseqaatinit erserpoq.

3.1.1.2. Meeqqap tapersersorneqarnissamik immikkut pisariaqartitai angerlarsimaffimmiluunniit ajornartorsiutit tapersersuinerim annikinnerusumik akuliunnikkut matussuserneqarsinnaanngitsut aaqqinneqarsinnaanngitsulluunniit kommunalbestyrelsi naliliippat kommuni meeqqap angajoqqaatut oqartussaassusermik tigummiatartut akuersitillugit angerlarsimaffiup avataanut inissinneqarnissaa suliniutigissavaa (akuersisitsilluni inissiineq).

Akuersisitsilluni inissiisarnek pillugu malittarisassat meeqqanik tapersersuisarnek pillugu inatsimmi § 27-miipput, taakkulu imaattunik oqaasertaqarput:

“§ 27. Kommunalbestyrelsi aalajangissavaa meeraq angerlarsimaffiup avataanut inissinneqassanersoq isumaginninnikkut § 45 malillugu misissuinerup takutippagu, meeqqap ikiorserneqarnissamut immikkut pisariaqartitaanik akuersinissamut anner-tuumik pingaaruteqartoq.

Imm. 2. Kommunalbestyrelsi imm. 1 malillugu aalajangiisinnaanngilaq, aatsaalli meeraq tusarniarneqaqqaarsimappat, tak. § 43, isumaginninnikkut sullissinermik mi-sissuisoqarsimappat, tak. § 45, aammalu iliuusissanut pilersaarusiortoqarsimappat, tak. § 46.

Imm. 3. Meeqqamut pitsaanerpaasussaq eqqarsaatigalugu meeqqap inissittariaqar-nerata isumaginninnermi sullissinikkut misissuineq iliuusissanullu pilersaarusiorneq utaqqisinnaanngippagit, misissuinerup nalaani inissiineq kommunalbestyrelsi aallar-tissavaa.

Imm. 4. Angajoqqaatut oqartussaassusilik ilaqtallu allat meeqqap inissineqarfi-gisaani ulloq unnuarlu inissimasinnaanerannik neqeroorfigineqarsinnaapput.”

Meeqqap angerlarsimaffimmi avataanut inissinneqarnissaa angajoqqaatut oqar-tussaassutsimik tigummiqartup akuerinngippagu kommunalbestyrelsi naliliis-saaq meeqqap angerlarsimaffimmi avataanut inissinneqarnissamik pisariaqartit-sinera ima pingaaruteqartiginersoq akuersisitsinani inissiisoqarnissaanik aalaja-ngiisoqartariaqarluni (akuersisitsinani inissiineq). Meeqqanik tapersersuisarneq pillugu inatsimmi § 27, imm. 1 pillugu immikkut oqaaseqaatit innersuussuti-gaakka.

3.1.1.3. Kommunalbestyrelsi pisuni erseqqinnerusumik taaneqartuni arlalinni meeraq akuersisitsinani angerlarsimaffiup avataanut inississavaa (akuersisitsina-ni inissiineq).

Taamaalilluni kommunalbestyrelsi akuersisitsinani inissiisoqarnissaanik aalaja-ngiissaaq, meeqqap peroriartornerata, peqqissusiata ineriartornerataluunniit ilu-ngersunartumik ajoquserneqarnissaa soorlu naammaginangitsumik isumassui-neq atornerluinerluunniit pissutigalugit aarlerinarluinnarpat, ajornartorsiutillu meeraq angerlarsimaffimmiitsillugu aaqqinneqarsinnaanngippata.

Akuersisitsinani inissiisarneq pillugu malittarisassat meeqqanik tapersersuisarneq pillugu inatsimmi § 28-miipput, taakkulu imaattunik oqaasertaqarput:

“§ 28. Kommunalbestyrelsip angajoqqaatut oqartussaassusilik meerarluunniit akuersiteqqaarnagit meeqqap angerlarsimaffiup avataanut inissineqarnissaa aalajangissavaa, meeqqap peroriartorneranut, peqqissusianut ineriartorneranulluunniit ilungersu-nartumik ajoquserneqarnissaa aarlerinarluinnarpat makku pissutigalugit:

- 1) meeqqamut amigartumik isumassuisoqarpat isumassuisoqanngippalluunniit,
- 2) timikkut tarnikkulluunniit persuttaaneqarsimappat, paarsinerluttoqarsimappat kinguaassiuutigulluunniit innarliisoqarsimappat,
- 3) meeqqami imaluunniit meeqqap qanigisaanik atornerluinermik ajornartorsiuteqartoqarpat, pinerlunniartartoqarpat allatigulluunniit inuuniarnikkut annertuunik ajornartorsiuteqartoqarpat, imaluunniit
- 4) meeqqami meeqqalluunniit qanigisaanik pissutsikkut naleqqussarnissamut allatigulluunniit ajornartorsiuteqartoqarpat.

Imm. 2. Imm. 1 malillugu taamaallaat aalajangiisoqarsinnaavoq, ajornartorsiutit meeqqap angerlarsimaffimmi najugaaqaannarneratigut aaqqinneqarsinnaanngitsut kommunalbestyrelsip tunngavissalimmik ilimagippagu.

Imm. 3. Kommunalbestyrelsi imm. 1 malillugu aalajangiisinnaanngilaq, aatsaalli isumaginninnikkut sullissinermik misissuisoqarsimappat, tak. § 45, aammalu iliuusissanut pilersaarusiortoqarsimappat, tak. § 46. Aammattaaq kommunalbestyrelsip meeraq tusarniarfigisinnaassavaa, tak. § 43, tassungalu atasumik meeraq angajoqqaatullu oqartussaassusilik nalunaarfigisimassallugit meeqqap illersuisoqarnissaanik pisinnaatitaaffeqarneranik, tak. § 44. Angajoqqaatut oqartussaassuseqartup najugaa imaluunniit sumiiffia ilisimaneqanngippat nalunaarut meeqqamik isumassuisuusumut tunniunneqassaaq.

Imm. 4. Meeqqamut pitsaanerpaasussaq eqqarsaatigalugu meeqqap inissittariaqarnerata isumaginninnermi sullissinikkut misissuineq iliuusissanullu pilersaarusiorneq utaqqisinnaanngippagit, misissuinerup nalaani inissiineq kommunalbestyrelsip aallartissavaa.”

3.1.2. Kommunip suliamik paasissutissanik nutaanik politiinit tigusaqarnermi kingornatigut suliarinninneranik paasinninnera

Suliami allagaatit kommunillu uannut allagai 29. november 2020-meersut aallavigalugit imatut paasivara kommunip isumaginninnermik ingerlatsivia ataatsimii-

titaliap siulittaasuata aalajangiinera kingornatigut A-p B-llu meeraat angajoqqaat aappariit akuersitinnagit angerlarsimaffiup avataanut nukinginnartumik inissinneqassasut 25. oktober 2018-imi aalajangiigallarsimasoq. Inissiinermut tunngaviusoq tassaavoq angajoqqaat aappariit paniata angajulliup D-p kinguaassiuutitigut killissanik qaangiivigineqarsimasinnaanerani pasitsaassineq. Meeqqat suliap politiinit sukumiinerusumik misissorneqarnerani illersorniarlugit meeqqat sisamat tamarmik angerlarsimaffiup avataanut inissinneqarput. Tunngaviutippara, immikkoortumi 2-mi oqaatigineqartutut, kommunip inissiineq pillugu aalajangiinera A-p B-llu meeraanut sisamanut tunngasuusoq.

Aammattaaq imatut paasivara A-p B-llu meeraasa sisamat angajoqqaat aappariit akuersitinnagit angerlarsimaffiup avataanut nukinginnartumik inissinneqarnissaannik isumaginninnermik ingerlatsiviup aalajangiinera kommunimi Ilaqutariinermut Ataatsimiititaliap aalajangiinikkut 6. december 2018-imeersuklut akuerisimagaa. Taamaallutik angajoqqaat aappariit meeraat sisamat angajoqqaat aappariit akuersitinnagit angerlarsimaffimmik avataani inissisimaneqaannartussanngorput. Kommunip aalajangiineranut tunngaviusoq uanga paasisattut tassaavoq D-p kinguaassiuutitigut killissanik qaangiivigineqarsimasinnaanerani suli pasitsaassisimaneq.

Aamma imatut paasivara politiit B allakkatigut 7. december 2018-imeersutigit paasitissimagaat D-p kinguaassiuutitigut killissanik qaangiivigineqarsimanagera pillugu suliamik misissuineq politiit unitsikkaat, kommunilu tamatuminnga 13. december 2018-imi ilisimatinneqarsimasoq.

Uanga paasinninnera unaavoq angajoqqaat aappariit paniinik angerlarsimaffiup avataanut inissiinissaq kommunip A-mut B-mullu 14. december 2018-imi akueritissimagaa, angajoqqaallu aappariit ernerat angerlartinneqarsimasoq, kinguaassiuutitigut killissanik qaangiisimasinnaanermik pasitsaassineq pillugu suliamik qulaani taaneqartumik misissuinerup politiinit unitsinneqarnerata kommunimut paasissutissiissutigineqarnerata kingornatigut.

Uanga paasinninnera aammattaaq unaavoq kommuni paasissutissanik politiinit tigusaqarnermi kingornatigut inissiinissamullu akuersissummik pissarsinermi ki-

ngornatigut A-p B-llu paniisa angerlarsimaffimmik avataanut inissinneqarnissaat pillugu nutaanik aalajangiisimangitsoq, kisiannili niviarsiaqqat inissinneqarsi-manerat kommunip ingerlatiinnarsimagaa, angajoqqaat aappariit imigassamik atornerluinerat innersuussutigalugu.

Kiisalu imatut paasivara kommunimi Ilaqutariinnermut Ataatsimiititaliaq A-p B-llu paniisa pingasut angajoqqaat aappariit akuersitinnagit angerlarsimaffimmik avataanut inissinneqarnissaannik aatsaat 12. juli 2019-imi aalajangeeqqissima-soq, Naammagittaalliuuteqartarfiup aalajangiinikkut 23. januar 2019-imeersuk-kut suliamik kommunimi nutaamik suliareqqitassanngortitsilluni utertitsinerata kingornatigut. Imatut paasivara kommunip aalajangiineranut 12. juli 2019-i-meersumut tunngaviusoq tassaasoq A-p B-llu imigassamik atornerluinerat.

3.1.3. Kommunip suliamik paasinninnera

Sulianik misissuininnut atatillugu kommuni qinnuigaara suliaq pillugu oqaaseqaa-teqaqqullugu. Kommuni qinnuigaara angerlarsimaffiup avataanut inissiisoqar-nissaanik kommunip aalajangiineranut tunngaviusoq pillugu apeqqutit arlallit akeqqullugit.

Kommunip nukinginnartumik inissiisoqarnissaanik aalajangiineranut 25. oktober 2018-imeersumut tunngavigisaa pillugu kommunip allakkani 9. oktober 2020-meersuni makku uannut paasissutissiisutigai:

“Aalajangiineq angajoqqaajusunut oqaasiinnartigut 25. oktober 2018-imi nalunaaruti-gineqarpoq. Qatanngutigiillu Isumaginninnermik Ingerlatsivimmit politiit ikiortigalugit aaneqarput. Kiisalu aalajangiinnermut tunngavilersuut ulloq taanna suliarineqarpoq, tassanilu oqaatigineqarpoq meeqqat angajoqqaaminnit sunnernerneqannginnissaat siunertarineqartoq.

Allakkat meeqqanik inissiinnermut tunngavilersuuterpiaasumik imaqanngillat. Pineqar-torli tassaavoq niviarsiaqqat ilaata, ([D]-p), kinguaassiuutitigut killissanik qaangiivigi-neqarsimasinnaaneramik pasitsaassineq, tamannalu kommunalbestyrelsimut ilisimatit-sissutigineqarpoq” (Ombudsmandeqarfimmi nutsigaavoq)

Inissiisoqarnissaanik kommunip aalajangiineranut 6. december 2018-imeersu-
mut tunngaviusoq pillugu paasissutissat makku kommunip allakkani 29. novem-
ber 2020-meersuni uannut aammattaaq paasissutissiissutigai:

“2.

A. Nalunaarut 6. december 2018-imeersoq Ilaqutariinnermut Ataatsimiititaliamit aala-
jangiinermik allagaapput. Allakkat 6. december 2018-imeersut ataatsimiititaliap
siulittaasuata 25. oktober 2018-imi aalajangerneranit akissutaapput (akissut nr. 1
takuuk).

Allakkat meeqqat inissinneqarnerannut tunngavilersuummik imaqanngillat, inissii-
nissamilli kommunalbestyrelsimut qinnuteqaat tunngavilersuutit suut pineqarne-
rannik imaqarluni. Taamaattumik akuersissuteqarnermik nalunaarummik aamma
imaqanngilaq, [D]-p kinguaassiuutitigut killissanik qaangiivigineqarsimasinnaane-
ranik pasitsaassineq pissutigalugu.

B. Aalajangiinermut tunngaviuvoq [B]-p (ataataasup) [D]-mut kinguaassiuutitigut kil-
lissanik qaangiiviginnissimasinnaaneranik pasitsaassineq. Tamannalu tunngavigalu-
gu siulittaasup aalajangiinissaanik 25. oktoberimi qinnuteqaateqartoqarpoq.” (Om-
budsmandeqarfimmi nutsigaavoq)

Politiit D-p kinguaassiuutitigut killissanik qaangiivigineqarsimasinnaaneranik
pasitsaassineq pillugu suliamik unitsitsimallutik nalunaarutaannik kommunip 13.
december 2018-imi tiguserata aamma A-p B-llu panimmik inissinneqarnis-
saannik 14. december 2018-imi akuersinerisa kingornatigut kommunip nutaamik
sooq aalajangiisimanginnera pillugu kommuni allakkani 29. november 2020-
meersuni aamma imaattunik paasissutissiivoq:

“[D]-p kinguaassiuutitigut killissanik qaangiivigineqarsimasinnaaneranik suliaq politiit
6. december 2018-imi suli suliaarat, taamaattumillu meeqqat pinngitsaaliissummik ar-
saarinnissutigineqarnissaannik aalajangiineq 25. oktober 2018-imeersoq suli atuulluni.
Kinguaassiuutitigut killissanik qaangiiviginninneq pineqanngitsoq politiit suliamik sulia-
rinninneranni aalajangiineq 13. december 2018-imi tigunearpoq, kisiannili angajoq-
qaat imigassamik angerlarsimaffimmi atornerluinerat tunngavigalugu meeqqat anger-
larsimaffiup avataanut inissinneqarnissaat aalajangerneqarsimalluni.

Taamaalilluni angerlarsimaffiup avataanut inissiinissamut akuersinermut uppenarsaat
angajoqqaanik 14. december 2018-imi atsiorneqarpoq.” (Ombudsmandeqarfimmi
nutsigaavoq)

3.1.4. Uanga naliliinera

Uanga naliliinera unaavoq kommuni A-p B-llu paniisa angerlarsimaffimmik avataanut inissinneqarnerannik, piffissami D-p kinguaassiuutitigut killissanik qaangiivigineqarsimasinnaanerannik pasitsaassinerannik suliap misissorneqarnerata unitsinneqarnissaannik politiit aalajangerannik kommunip ilisimasaqalerfiata nalaani, nutaamik tamanna pillugu aalajangiinani aalajangiusimannissinnaasimangitsoq.

Uanga paasinninnera unaavoq pissusiviusut angajoqqaat aappariit meeraasa sisamat angerlarsimaffimmik avataanut inissinneqarnissaannik kommunip aalajangiinerinut 25. oktober 2018-imeersumut aamma 6. december 2018-imeersumut tunngaviusut piffissamit politiit aalajangerannik kommunip ilisimasaqalerfianit atorunnaarsimasut.

A-p B-llu meeraasa sisamat angerlarsimaffimmik avataanut angajoqqaat aappariit akuersitinnagit inissiinissamik aalajangiinerinut 25. oktober 2018-imeersumut aamma 6. december 2018-imeersumut D-p kinguaassiuutitigut killissanik qaangiivigineqarsimasinnaanerannik pasitsaassinerup tunngaviunerannik suliami paasissutissiissutigineqartut pingaartillugit isiginiarpakka.

D-p kinguaassiuutitigut killissanik qaangiivigineqarsimasinnaanerannik pasitsaassineq pillugu suliamik misissuinerup politiit unitsinneqarnerannik kommunip 13. december 2018-imi paasitinneqarsimanera aammattaaq pingaartillugu isiginiarpara.

Kiisalu manna pingaartillugu isiginiarpara, tassalu uppernarsaat A-p B-llu 14. december 2018-imi atsiorsimagaat, tassanngalu erserluni angajoqqaat aappariit panimmik pingasut angerlarsimaffimmik avataanut inissinneqarnissaat akueri-gaat.

Uanga naliliinera unaavoq A-p B-llu meeraat sisamat kinguaassiuutitigut killissanik qaangiiviginnissimannermik pasitsaassineq pillugu suliap misissorneqarnera

unitsinniarlugu politiit aalajangernerannik kommunip 13. december 2018-imi ilisimasaqalernerata kingornatigut angerlarsimaffimmik avataani inissisimaneqaannassanersut imaluunniit meeqqat angerlartinneqarsinnaanersut kommunip isummerfigisimasariaqaraluaraa.

A-p B-llu paniinik inissiineq kommunip ingerlatiinnarpaa, politiinillu paasissutis-sanik ilisimasaqalernermi kingornatigut nutaanik aalajangiinani. Tamanna isori-sarialerujussuartut isigaara.

Kiisalu uanga paasinninnera unaavog inissiineq meeqqanik tapersersuisarneq pillugu inatsimmi angerlarsimaffiup avataanut akuersisitsilluni iniissiisarneq pillugu aalajangersagaq tunngavigalugu pissanersog kommunip tamatumunnga atattillugu isummerfigisimasariaqaraluaraa, tassami angajoqqaat aappariit paniisa inissinneqarnissaat kommunip A-mut B-mullu akueritissimmagu.

Angajoqqaat aappariit panitik angerlarsimaffimmik avataanut inisinneqassasut 14. december 2018-imi akuersisimagaluartut A-p B-llu meeraat angerlarsimaffiup avataanut inissinniarlugit kommuni soog aalajangersimanersog aalajangiinermi 12. juli 2019-imeersumi takuneqarsinnaangilaq.

Tamatuma isumaqalersippaanga angajoqqaat aappariit paniisa angerlarsimaffimmik avataanut inissinneqarnissaannut akuersissummik kommunip A-mit B-millu pissarsisimanagera kommunip inissiinissamut sulianik suliarinninnermini arajutsisimagaa.

3.2. Kommunip inissiisoqarnissaanik aalajangiinerini tunngavilersuut naammagittaalliornissamullu periarfissaq pillugu ilitsersuineq

3.2.1. Inatsiseqartitsinikkut tunngavigisaq

3.2.1.1. Meeqqamik angerlarsimaffiup avataanut inissiinissamik aalajangiineq ingerlatsinermik inatsiseqartitsinermi malittarisassanik nalinginnaasunik ilaatigut pisortani suliasat suliarineqartarnerat pillugu Inatsisartut inatsisaanni nr. 8-mi, 13. juni 1994-imeersumi kingusinnerusukkut allannguuteqartinneqarsimasumi

(matuma kingornatigut suliassat sularineqartarnerat pillugu inatsimmik taaneqartartussami) aalajangersarneqartunik eqqortitsisunngortillugu ilusilersorneqartussaavoq.

Angajoqqaatut oqartussaassusermik tigummiartoq akuersitinnagu inissiinissamik aalajangiinerup ilusilerneqarnera pillugu meeqqanik tapersersuisarneq pillugu inatsimmi § 29, imm. 1-imi makku aammattaaq aalajangersarneqarput (pinngitsaaliilluni inissiineq):

“**§ 29.** § 28 malillugu kommunalbestyrelsip angerlarsimaffiup avataanut akuersititseqqaarnani inissiinermik akuersissuteqarneq angajoqqaatut oqartussaassusilimmut imaluunniit meeqqamik isumaginnittuusumut sapinngisamik akunnerit 24-t qaangiut-sinnagit nalunaarutigisimassavaa. Nalunaarut inissiinermik aalajangiisoqarnerata sumik tunngaveqarneranik imaqassaaq kiisalu naammagittaalliorsinnaanermut ilitser-suut.”

Meeqqanik tapersersuisarneq pillugu inatsimmi § 29, imm. 1 malillugu nalunaarut akuersisitsinani inissiineq pillugu aalajangiinermik imaqassaaq, matumani tunngavilersuut ingerlatsinermik inatsiseqartitsinermi tunngavilersuisussaanermik piumasaqaat naapertorlugu sularineqarsimasoq ilanngullugu eqqarsaatigalugu. Tamanna aalajangersagaq taanna pillugu immikkut oqaaseqaatini takuneqarsinnaavoq.

3.2.1.2. Suliassat sularineqartarnerat pillugu inatsimmi § 22-kkut aalajangersarneqarpoq allakkatigut aalajangiinerit tunngavilersuummik ilaqartinneqartassasut, aalajangiineq innuttaasumut pineqartumut tapersiisuulluinnanngippat.

Tunngavilersuut inatsimmi malittarisassanut aalajangiinermi tunngavigineqartunut innersuusummik imaqartassaaq. Aalajangiineq aqutsinermi allaffissornikkut naliliinermik tunngaveqarpat pingaarnertut isiginiagassat naliliinermut aalajangiisuusimasut tunngavilersuummi aamma oqaatigineqassapput. Kiisalu tunngavilersuut tamanna pisariaqarpat suliami pissusiviusunik aalajangiinermi pingaartillugit isiginiarneqarsimasunik paasissutissat pillugit nassuiaammik naatsumik imaqar-

tassaaq. Tamanna suliassat suliarineqartarnerat pillugu inatsimmi § 24, imm. 1-ikkut 2-kkullu aalajangersarneqarpoq.

Tunngavilersuut aalajangiinerup pineqartutut sooq imaqarnera pillugu nassuiaatitut isikkoqartassaaq. Tamanna ilaatigut suliassat suliarineqartarnerat pillugu inatsimmi § 24 pillugu immikkut oqaaseqaatinit ilaatigut erserpoq.

3.2.1.3. Allakkatigut aalajangiinerit ingerlatsinermi oqartussaasumut allamut naammagittaalliuutigineqarsinnaasut naammagittaalliornissamut periarfissaq pillugu ilitsersuummik aammattaaq imaqartinneqassapput, oqartussaasoq naammagittaalliorfissaq oqaatigalugu naammagittaalliuutillu tunniunnerani qanoq periaaseqarnissaq paasissutissiissutigalugu, matumani piffissaliussaqqarpit piffissaliussaqq ilanngullugu paasissutissiissutigalugu. Tamannali atuutinngilaq aalajangiineq innuttaasumut tapersiisuulluinnarpit. Tamanna suliassat suliarineqartarnerat pillugu inatsimmi § 25-kkut aalajangersarneqarpoq.

Kommunip meeqqanik tapersersuisarneq pillugu aalajangiineri Naammagittaalliuuteqartarfimmut isumaginnittoqarfiup aquneqarnera aqqissuussaanelu pillugit Inatsisartut peqqussutaat nr. 11, 12. november 2001-imeersoq kingusinnerusukkut allannguuteqartinneqarsimasoq (matuma kingornatigut isumaginnittoqarfiup aquneqarnera aqqissuussaanelu pillugit Inatsisartut peqqussutaannik taaneqartartussaq) tunngavigalugu naammagittaalliuutigineqarsinnaapput. Tamanna meeqqanik tapersersuisarneq pillugu inatsimmi § 60, imm. 1-ikkut aalajangersarneqarpoq.

Isumaginnittoqarfiup aquneqarnera aqqissuussaanelu pillugit Inatsisartut peqqussutaanni § 8, imm. 1-ikkut aalajangersarneqarpoq kommunip aalajangiinera pillugu naammagittaalliuut Naammagittaalliuuteqartarfimmut tunniunneqassasoq, aalajangiinerup kingornatigut sapaatit akunneri arfinillit qaangiut-sinnagit.

3.2.2. Uanga kommunip inissinissamik aalajangiinerini tunngavilersuummik naammagittaalliornissamullu periarfissaq pillugu ilitsersuinermik paasinninera

3.2.2.1. Uanga paasinninnera unaavoq kommunimi isumaginninnermik ingerlatsivik A-p B-llu meeraasa sisamat angerlarsimaffimmik avataanut angajoqqaat aappariit akuersitinnagit nukinginnartumik inissinneqassasut siulittaasup aalajangerneratigut 25. oktober 2018-imi aalajangiigallarsimasoq, tassami D-p kinguaassiuutitigut killissanik qaangiivigineqarsimasinnaanera pasitsaanneqarsimammat.

Kommunip inissiineq pillugu aalajangiineranit 25. oktober 2018-imeersumit makku erserput:

“Pillugu: Meeqqassi angerlarsimaffiup avataanut inissinneqarnerat

Avannaata Kommuniani [illoqarfimmi X-imi] inunnik isumaginninnermi allaffimmit matumuuna allakkatigut ilisimatitsissutit ingerlateqqinneqarput.

Ulloq 18. oktober 2018 Politiiniik allakkanik tigusaqarpugut, nalunaarutunik imaqartunik nalunaarutiginnittoqarsimasoq, panissi [D] pillugu kinguaassiuutitigut qaangiiffigineqarsimaneranik pasitsaassinnermik imaqartunik.

Allakkat tiguneqartut toqqammavigalugit isumaginnittoqarfimmiik tusarniaaneq pismavoq.

Meeqqat inuusuttuaqqallu tapersorsorneqarnissaannut Inatsisartut inatsisaat nr. 20, 26. juni 2017-imeersut § 6 stk. 1+2, § 7 stk. 2, § 25 stk. 3-4, § 28, 2) & 4, § 44 stk. 2.

Angerlarsimaffiup avataanut inissiingasuarnissaq aalajangiunneqarsimavoq.

Isumaginnittoqarfiup aalajagingaanut isumaqataangikkuit ukua allakkat tiguneriniit sapaatip akunneri arfinillit qaangiutsinnagit naammagittaalliuuteqarsinnaavutit.

Naammagittaalliorfissaq akkiunneqarpoq.”

Uanga paasinninnera aammattaaq unaavoq isumaginninnermik ingerlatsiviup A-p B-llu meeraasa sisamat angerlarsimaffimmik avataanut angajoqqaat aappariit

akuersitinnagit nukinginnartumik inissinneqarnissaannik aalajangiinera kommunalbestyrelsip 6. december 2018-imi akuerisimagaa, tassami D-p kinguaassiuutitigut killissanik qaangiivigineqarsimasinnaanera pasitsaanneqarsimammat.

Kommunip inissiisoqarnissaannik aalajangiineranit 6. december 2018-imeersumit makku erserput:

“Matumuuna nalunaarutigineqassaaq Avannaata Kommuniani ilaqutareeqarnermut ataatsimiititaliap ulloq 05. december 2018 ataatsimiinnermini aalajangermat meeqqat [E], [F], [D] aamma [C] angerlarsimaffiup avataanut inissinneqarmata.

Inatsit una tunngavigalugu aalajangiisoqarpoq: Meeqqat tapersorsorneqarnissaannut Inatsisartut inatsisaat nr. 20, 26. juni 2017-imeersoq [§ 28 imm. 2] tunngavigalugu.” (Kalaallisua qallunaatuualu imminnut naapertuutinngillat [...])

Suliaq Naammagittaalliuuteqartarfiup kommunimi suliareqqitassanngortillugu 23. januar 2019-imi utertippaa, Naammagittaalliuuteqartarfimmi isumaqarmat kommunip aalajangiinermut 6. december 2018-imeersumut tunngavilersuutaa amigaatilerujussuusoq.

Naammagittaalliuuteqartarfiup aalajangiineranit 23. januar 2019-imeersumit makku erserput:

“Suliaq Isumaginninnermi Naammagittaalliuuteqartarfiup suliareqqitassanngortillugu utertippaa.

Kommuni nutaamik aalajangiissaaq, suliassat suliarineqartarnerat pillugu inatsimmi aalajangiinerit pillugit piumasaqaatinik eqqortitsisumik, matumani tunngavilersuineq, naammagittaalliornissamut periarfissaaq pillugu ilitersuineq il.il. eqqarsaatigalugit. Pissusiviusut suut kommunip aalajangiinermi tunngaviutissimanerai kiisalu inatsimmi aalajangersagaq aalajangersakkalluunniit tunngavigineqarsimasut aalajangiinermi paassissutissiisutigin eqqassallutik. Aalajangiineq piffissami taamani pineqartumi pissutsit aallaavigalugit pissaaq.

Tamatumunnga tunngavilersuutigineqarpoq kommunip aalajangiineranut 6. december 2018-imeersumut tunngavilersuutip amigaateqarnerujussua pissutsinillu kommu-

nip aalajangiinnermini tunngaviutissimasaanik eqqortumik paasissutissiisuunnginnera. Meeqqat tapersorsorneqarnissaannut Inatsisartut inatsisaanni nr. 20-mi, 26. juni 2017-imeersumi aalajangersakkat sorliit tunngavigisimanerlugit kommunip aamma oqaatigisimanngilaa.” (Ombudsmandeqarfimmi nutsigaavoq)

Kiisalu uanga paasinninnera unaavoq kommunalbestyrelsi Isumaginninnermi Naammagittaalliuuteqartarfiup suliamik suliareqqitassanngortitsilluni utertitsinerata kingornatigut A-p B-llu panii angajoqqaat aapparit akuersitinnagit angerlarsimaffiup avataanut inissinneqassasut aatsaat 12. juli 2019-imi aalajangiisimasoq.

Kommunip inissiinissamik aalajangiinneranit 12. juli 2019-imeersumit makku er-serput:

“Meeqqanik angerlarsimaffiup avataanut inissiinnermut tunngatillugu

Matumuuna nalunaarutigineqassaaq Avannaata Kommuniani ilaqutareeqarnermut ataatsimiititaliap ulloq 14. juni 2019 ataatsimiinnermini aalajangerpaa [D] angerlarsimaffiup avataanut inissinneqassasoq.

Uku allakkat tigoriarukkit isumaginninnermut ilaqutareeqarnermullu immikkoortortarqarfimmut sullissisornut saaffiginnissaatit, suliap ingerlariaqqinnissaanut paasissutissanik taamatullu sullissinerup qanoq ingerlanneqarnissaanut pilersaarusionermut peqataaqullutit.

Inatsit toqqammavigineqartoq: Meeqqat inuusuttuaqqallu tapersorsorneqarnissaannut Inatsisartut inatsisaat 20, 26. juni 2017-imeersoq § 28 stk. 2 toqqammavigilugu.” (Kalaallisua qallunaatuualu imminnut naapertuutinnigillat [...])

3.2.2.2. Uanga paasinninnera unaavoq kommuni A-p B-llu meeraasa sisamat angerlarsimaffimmik avataanut nukinginnartumik inissinneqarnissaannik aalajangiinnermini 25. oktober 2018-imeersumi aalajangiinerup Naammagittaalliuuteqartarfiup aalajangiinerup tigungneranit sapaatit akunneri arfinillit qaangiut-sinnagit naammagittaalliuutigineqarsinnaaneramik angajoqqaanut aappariinnut ilitsersuisimasoq.

Kommunip inissiinissaq pillugu aalajangiinerani 25. oktober 2018-imeersumi naammagittaalliornissamut periarfissaq pillugu ilitersuutip imaattup takuneqarsinnaanera innersuussutigaa:

“Isumaginnittoqarfiup aalajagingaanut isumaqataangikkuit ukua allakkat tiguneriniit sapaatip akunneri arfinillit qaangiutsinnagit naammagittaalliuuteqarsinnaavusi.

Naammagittaalliorfissaq akkiunneqarpoq.”

Oqaatigaara kommuni A-p B-llu paniisa angerlartinneqarnissaat itigartitsissutigineqassasoq aalajangiinermi 18. juli 2020-meersumi tamatuma pissuseqataanik ilitersuisimasoq aalajangiineq Naammagittaalliuuteqartarfimmut aalajangiinerup tiguneranit sapaatit akunneri arfinillit qaangiutsinnagit naammagittaalliuutigineqarsinnaasoq.

Uanga paasinninnera aammattaaq unaavoq kommuni A-p B-llu paniisa angerlarsimaffimmik avataanut nukinginnartumik inissinneqarnissaannik aalajangiinermini 12. juli 2019-imeersumi ilitersuisimasoq aalajangiineq Naammagittaalliuuteqartarfimmut tulleriinneri malillugit aalajangiinerup kingornatigut sapaatit akunneri arfinillit qaangiutsinnagit aamma piffissamit aalajangiiffiusumit sapaatit akunneri arfinillit qaangiutsinnagit naammagittaalliuutigineqarsinnaasoq.

Kommunip inissiinissaq pillugu aalajangiinerani 12. juli 2019-imeersumi naammagittaalliornissamut periarfissaq pillugu ilitersuutip imaattup takuneqarsinnaanera innersuussutigaa:

“Aalajangerneq una maalaaruteqartarfimmut, Siunnersuisoqatigiinnut Ataatsimiititalianullu Aqutsisoqarfik, Isumaginninnermut Maalaaruteqartarfik, [...], maalaarutigineqarsinnaavoq aalajangernermiit sapaatit akunneri arfinillit qaangiutsinnagit. Allakkanut tapiliullugu nassiunneqarpoq maalaaruteqarnissamut immersugassaq.”

3.2.3. Kommunip suliamik paasinninnera

3.2.3.1. Kommunimut allakkanni 9. oktober 2020-meersuni oqaatigaara kommunip aalajangiineri 6. december 2018-imeersoq aamma 12. juni 2019-imeersoq tunngavilersuummik imaqanngitsut, kommunilu tamakku tunngavigalugit qinnui-gaara kommunip aalajangiinerinut tunngaviusoq pillugu apeqqutit erseqqinnerusumik oqaatigineqartut akeqqullugit.

Kommunip uannut oqaaseqaammini 29. november 2020-meersumi inissiisoqar-nissanik aalajangiinerminut 6. december 2018-imeersumut tunngavilersuut tunngaviusorlu pillugit makku paasissutissiissutigai:

“2.

A. Nalunaarut 6. december 2018-imeersoq Ilaqutariinnermut Ataatsimiititaliamit aalajangiinermik allagaapput. Allakkat 6. december 2018-imeersut 25. oktober 2018-imi siulittaasup aalajangerneranit (akissut nr. 1 takuuk) akissutaapput. Allakkat imminni meeqqat inissinneqarnerannut tunngavilersuummik imaqanngillat, inissiinissamilli kommunalbestyrelsimut qinnuteqaat tunngavilersuutit suut pineqarneranik imaqarluni. Taamaattumik aamma akuersissuteqarnermik nalunaarummik imaqanngilaq [D]-p kinguaassiuutitigut atornerlunneqarsimasin-naaneranik pasitsaassineq pissutigalugu.” (Ombudsmandeqarfimmi nutsigaavoq)

Kommunip uannut oqaaseqaammi 29. november 2020-meersumi kommunip aalajangiineranut 12. juli 2019-imeersumut tunngavilersuut tunngaviusorlu pillugit makku aammattaaq paasissutissiissutigai:

“Qatanngutigiinnik inissiinerup sivitsorneqarnissanik qinnuteqaat angajoqqaajusunik oqaloqateqartarnernik, taamatullu aamma angajoqqaajusut imigassamik atornerluine-rat pillugu innuttaasunit saaffiginnissutinik tunngaveqarpoq.” (Ombudsmandeqarfimmi nutsigaavoq)

3.2.4. Uanga naliliinera

3.2.4.1. Qulaani oqaatigineqartutut meeqqanik tapersersuisarneq pillugu inatsimmi § 29, imm. 1-ikkut aamma suliassat suliarineqartarnerat pillugu inatsimmi § 22-kkut aalajangersarneqarpoq akuersisitseqqaarnani inissiinissaq pillugu ingerlatsiviup aalajangiinera allakkatigut nalunaarutigineqartassasoq tunngavilersuummillu ilaqartinneqartassalluni.

Suliassat suliarineqartarnerat pillugu inatsimmi § 24, imm. 1-ikkut aalajangersarneqarpoq aalajangiinermut tunngavilersuut inatsimmi malittarisassanut aalajangiinermi tunngavigineqartunut innersuussummik imaqartassasoq.

Uanga paasinninnera unaavoq kommuni akuersisitsinani inissiisoqarnissaanik aalajangiinermi 25. oktober 2018-imeersumi meeqqanik tapersersuisarneq pillugu inatsimmi aalajangersakkanut innersuussisimasoq, aalajangersakkat pineqartut tunngavigalugit aalajangiisimangikkaluarluni. Taamaalilluni kommunip meeqqanik tapersersuisarneq pillugu inatsimmi § 25, imm. 3-4 immikkut iliuuserineqartartunut tunngasut aamma § 44, imm. 2 meeqqanik illersuisoqartitsisarnermut tunngasoq innersuussutigisimavai, meeqqanilli tapersersuisarneq pillugu inatsimmi § 6 aalajangiinissamut pisinnaatitaanermut tunngasoq aamma § 28 akuersisitsinani inissiisarnernut tunngasoq taamaallaat tunngavigalugit aalajangiisimagunarluni.

Tamanna pitsaangitsutut isigaara.

Uanga paasinninnera aammattaaq unaavoq kommunip aalajangiinermi 6. december 2018-imeersup qallunaatuani meeqqanik tapersersuisarneq pillugu inatsimmi aalajangersagaq sorleq tunngavigisimanerlugu innersuussutigisimangikkaa, taamaallaalli inatsit kisiat innersuussutigisimallugu.

Tamanna taamatutaaq pitsaangitsutut isigaara.

Kiisalu uanga paasinninnera unaavoq kommunip akuersisitsinani inissiisoqarnissaanik aalajangiinermi 6. december 2018-imeersup kalaallisuuani aamma 12. juli

2019-imeersup kalaallisuuani qallunaatuuanilu meeqqanik tapersersuisarneq pillugu inatsimmi § 28, imm. 2-muinnaq innersuussisimanera naammangitsoq.

Tamanna isorisarialittut isigaara.

3.2.4.2. Suliassat suliarineqartarnerat pillugu inatsimmi § 24, imm. 1-ikkut aalajangersarneqarpoq aalajangiinermut tunngavilersuut pingaarnertut isiginiagas-sanik naliliinermut aalajangiisuusunik imaqartassasoq, aalajangiineq aqutsiner-mi allaffissornikkut naliliinermik tunngaveqarsimappat.

Meeraq angerlarsimaffimmi avataanut inissinneqassanersoq naliliineq aqutsiner-mi allaffissornikkut naliliinermik tunngaveqarpoq, taamaattumillu aalajangiinermut tunngavilersuummi pingaarnertut isiginiagassat kommunip naliliinerani aalajangiisuusimasut aamma oqaatigineqartussaapput.

Tunngavilersuut tamatuma saniatigut pissusiviusut kommunip aalajangiinermi pingaartillugit isiginiarsimasai pillugit nassuiaammik naatsumik imaqartussaa-voq. Tamanna suliassat suliarineqartarnerat pillugu inatsimmi § 24, imm. 2-kkut aalajangersarneqarpoq.

Uanga paasinninnera unaavoq kommunip akuersisitsinani inissiisoqarnissaanik aalajangiineri 25. oktober 2018-imeersoq, 6. december 2018-imeersoq aamma 12. juli 2019-imeersoq tunngavilersuutitaqanngitsut amigartumilluunniit tunngavilersorneqarsimasut.

Tamanna isorisarialerujussuartut isigaara.

Kommunip oqaaseqaammi 29. november 2020-meersumi uannut oqaatigaa kom-munip inissiisoqarnissaanik aalajangiinera 6. december 2018-imeersoq aalaja-angiinermut tunngavilersuummik imaqanngitsoq, tassami tunngavilersuut inissii-soqarnissaanik kommunimut qinnuteqaammi (inassuteqaammi) takuneqarsin-naammat.

Taanna pillugu oqaatigaara uanga paasinninnera unaasoq kommunip inissiisoqar-nissanik aalajangiineranut tunngavilersuutip kommunalbestyrelsimut inassute-qaammi takuneqarsinnaanera naammanngitsoq, tamatumalu suliassat sularine-qartarnerat pillugu inatsimmi tunngavilersuisarneq pillugu piumasaqaataasoq eq-qortinngikkaa.

3.2.4.3. A-p B-llu meeraasa angerlarsimaffimmik avataanut nukinginnartumik inissinneqarnissaannik kommunip aalajangiinerani 25. oktober 2018-imeersumi meeqqap sorliup pineqarnera takuneqarsinnaanngilaq, tunngaviutipparali aalaja-ngiineq angajoqqaat aappariit meeraannut sisamanut tunngasuusoq, tassalu D-mut, F-imut, E-mut aamma C-mut.

Kommunip aalajangiineranit 6. december 2018-imeersumit erserpoq A-p B-llu meeraat D, F, E aamma F aamma C angerlarsimaffimmik avataani inissisimane-qaannassasut. Aalajangiineq taamaalilluni taanna angajoqqaat aappariit mee-raannut sisamanut tunngasuuvoq.

Uanga paasinninnera unaavoq meeraq kina pineqartoq kommunip meeqqamik a-ngerlarsimaffiup avataanut inissiiinissamik aalajangiinerani erseqqissumik paat-soorneqarsinnaangitsumillu takuneqarsinnaassasoq.

Taamatuttaaq meeqqap angerlarsimaffimmi avataanut inissinneqarnissaanik aa-lajangiineq meeqqat ataasiakkaarlugit erseqqissumik meeqqanullu pineqartunut tunngasunik kommunip aalajangiineranut naliliissutinik imaqartussaavoq.

3.2.4.4. Suliassat sularineqartarnerat pillugu inatsisikkut aalajangersarneqar-poq allakkatigut aalajangiineq aqutsinermi allaffissornikkut oqartussaasumut al-lamut naammagittaalliuutigineqarsinnaaguni naammagittaalliornissamut periar-fissaq pillugu ilitersuummik imaqartinneqartassasoq.

Meeqqap angerlarsimaffimmi avataanut inissinneqarnissaanik aalajangiinerit i-maluunniit meeqqamik inissinneqarsimasumik angerlatitsiniarnermik itigartitsi-nerit pillugit naammagittaalliuutit Naammagittaalliuuteqartarfimmut aalajangi-nerup pineranit sapaatit akunneri arfinillit qaangiutsinnagit naammagittaalliuu-

tigineqarsinnaapput. Tamanna meeqqanik tapersersuisarneq pillugu inatsisikkut aamma isumaginnittoqarfiup aqunneqarnera aqqissuussaanelu pillugit Inatsisartut peqqussutaatigut aalajangersarneqarpoq. Immikkoortumi 3.2.1.3-mi inatsiseqartitsinikkut tunngavik innersuussutigaara.

A-p B-llu meeraasa sisamat angerlarsimaffimmik avataanut nukinginnartumik inissineqarnissaannik kommunip aalajangiineranit 25. oktober 2018-imeersumit erserpoq aalajangiineq Naammagittaalliuuteqartarfimmuk kommunip allagaasa tigineqarnerannit sapaatit akunneri arfinillit qaangiutsinnagit naammagittaalliutitigineqarsinnaasoq. Naammagittaalliornissamut periarfissamik ilitsersuineq tamatuma pissuseqataa angajoqqaat aappariit meeraasa angerlartinniarneqarnerannik itigartitsisoqarnissaannik kommunip aalajangiineranit 18. juli 2020-meersumit erserpoq.

Uanga paasinninnera unaavoq kommuni naammagittaalliornissamut periarfissaq pillugu kukkusumik ilitsersuisimasoq, naammagittaalliornissamummi piffissalissaq aalajangiinermit aallartillugu naatsorsorneqartarmat, aalajangiinerup tigineqarneranit aallartinnani.

Tamanna ajuusaarnartutut isigaara.

Kommunip aalajangiineranit 12. juli 2019-imeersumit erserpoq kommunimi Ilaqutariinnermut Ataatsimiititaliaq 14. juni 2019-imi aalajangertoq A-p B-llu panii angerlarsimaffimmik avataanut nukinginnartumik inissinneqassasut. Aammattaaq erserpoq kommunip aalajangiinera Naammagittaalliuuteqartarfimmuk tullerriinneri malillugit aalajangiinerup kingornatigut sapaatit akunneri arfinillit qaangiutsinnagit aamma piffissamit aalajangiiffiusumit sapaatit akunneri arfinillit qaangiutsinnagit naammagittaalliutitigineqarsinnaasoq.

Uanga paasinninnera unaavoq kommunip aalajangiinerani 12. juli 2019-imeersumi naammagittaalliornissamut periarfissaq pillugu ilitsersuineq naammagittaalliornissamut piffissaliussap qaqugukkut ingerlalnissaa eqqarsaatigalugu aalajangiinermik tigusisumit paatsoorneqarsinnaasoq.

Tamanna ajuusaarnartutut aammattaaq isigaara.

3.3. Piffissaq kommunip suliami suliareqqitassanngorlugu kommunimut utertinneqartumi suliamik suliarinninnermut atugaa

3.3.1. Inatsiseqartitsinikkut tunngavigisaq

3.3.1.1. Naammagittaalliuuteqartarfik suliamik meeqqap angerlarsimaffimmi avataanut inissinneqarneranut tunngasumik suliareqqitassanngortitsilluni kommunimut utertitsigaangat kommuni qanoq pilertortigisumik aalajangiisassanersoq immikkut piffissaliussat meeqqanik tapersersuisarnej pillugu inatsimmi aalajangersarneqarsimangillat.

Piffissaq oqartussaasut sulianik suliarinninnerminnut atortagaat pillugu ataatsimut malittarisassanik suliassat suliarineqartarnerat pillugu inatsimmi inatsisilunniit allani aamma aalajangersaasoqarsimangilaq.

Nalinginnaasumilli ilimagineqarpoq suliart sapinngisamik pilertornerpaamik illersorneqarsinnaasumillu suliarineqartassasut ingerlatsinermi ileqqorissaarnerup nassatarigaa.

Namminersornerullutik Oqartussat Inatsisileriffiata (massakkut Naalakkersuisut inatsisilerinnermut immikkoortortaqaarfiata) suliassat suliarineqartarnerat pillugu inatsit pillugu ilitsersuusiani december 1994-imeersumi imm. 199-i-mi 204-milu aammattaaq imaattunik allassimasoqarpoq:

“**199.** Suliassat tamarmik pisortat ingerlatsiviini suliarineqartut soorunami sapinngisamik pisariitsumik, pilertortumik aningaasartuutaavallaanngitsumillu suliarineqartarnissaannik piumasaqaat pingaartumik atuuppoq suliassanut inuit ataasiakkaat imaluunniit namminersorlutik ingerlatseqatigiiffiit, suliffeqarfiit, peqatigiiffiit il.il. attuumassuteqarfigisaanni.

[...]

204. Suliassat suliarineqartarnerat pillugu inatsit suliassat qanoq sivilutigisumik suliarineqartarnissaat pillugu nalinginnaasunik aalajangersagartaqanngilaq. Tamatumunnga ilaatigut pissutaavoq suliassat pisortat ingerlatsiviinit suliarineqartartut assigiinneqimmata assigiinneqisunillu annertussuseqartarlutik, taamaattumik inatsisikkut pisortat ingerlatsiviini qanoq sivilutigisumik suliarineqartarnissaasa aalajangersimsumik malittarisassiornissaat ajornarluinnartussaalluni, tassa eqqartuussivinni ajornarpallaanngitsumik atortinniarneqarsinnaasunik.

Kisiannili Folketingip Ombudsmandiata oqaaseqaatigisartagai tunngavigalugit nalinginnaasunik ingerlatsinermi ileqqorissaarnerup malinniarneqarnissaani suliassat qanoq sivilutigisumik suliariniarneqartarnissaat pillugu malittarisassaqaartitsisoqarpoq, matuma ataani suliamut tunngassuteqartup suliap qanoq sivilutigisumik suliarineqassangatinneqarneranik ilisimatinneqartarnissaa ilanngullugu.

Ombudsmandip aammattaaq aalajangikkat ilaanni tikkuavigisarsimavaa suliat sivilutisumik aalajangiivigineqaratik uninngatinneqartarnissaat pinaveersaarniarlugu kiisalu puigortoorneqarlutik aalajangiivigineqanngitsoortarnissaat pinaveersaarniarlugu oqartussaasut naammattumik *atorsinnaalluurtunik suliat uterfigeqqinneqartarnissaannut allattuiffiliortarnissaat.*"

Suup piffissatut sulianik suliarinninnermut atorneqartutut naammaginartutut isigineqarsinnaaneranik apeqqut ataatsimut akineqarsinnaanngilaq, sulianili atasiakkaani pisumi naliliinermik tunngaveqarluni.

Oqartussaasup suliaq pisariaqarneratut pilertortigisumik suliarisimaneraa apeqqummik naliliineq piffissap suliamik suliarinninnermut atorneqartup tamarminusup saniatigut pissutsit allat aamma isiginiartariaqarput. Tamanna ilaatigut suliame illua'tungiusup pilertortumik aalajangiisoqarnissaanik pisariaqartitsinera soqutigisaqarneralu, suliap pissusia, ajornakusuussusia, oqartussaasup misissuinnissaata annertussusia piffissarlu oqartussaasup suliani pisumut assingusuni suliarinninnerminut atortagaa eqqaarsaatigalugit.

Siusinnerusukkut suliani arlaqartuni piffissaq oqartussaasut sulianik suliarinninnerminnut atugaat pillugu oqaaseqaateqartarpunga. Suliaq 2011-mi ukiumoortumik nalunaarutinni immikkoortutut 5.7.1-itut ilanngunneqartoq kiisalu 2005-imi ukiumoortumik nalunaarutima qupperneq 69 tullialu (qallunaatuuanilu

qupperneq 56 tullialu) ilaatigut innersuussutigaakka. Suliaq taaneqartoq kinguleq Ombudsmandeqarfimmi periaatsimut pisoqaanerungaatsiartumut innersuussummik imaqarpoq. Piffissaq kommunit sulianik suliarinninnerminut atugaat pillugu suliat 2018-3, 2018-4 aamma 2019-2 nittartakkanni tamanut saqqummiunneqartut aammattaaq innersuussutigaakka.

Suliami 2019-2-mi suliani meeraq angajoqqaatut oqartussaassusermik tigummiaqartoq akuersitillugu angerlarsimaffimmi avataanut inissinneqarsimasoq angerlartikkumallugu qinnutigisanut tunngasuni piffissaq suliamik suliarinninnermut atorineqartartumik uanga naliliinera pillugu makku oqaatigaakka:

“Uanga paasinninnera unaavoq suliami matumanisut ittumi angajoqqaatut oqartussaassutsimik tigummiaqartup meeqqami akuersisitsilluni inissinneqarsimasup angerlartinneqarnissaanik qinnuteqarfigisaani qinnutigisaq akuerineqarsinnaanersoq kommunip sapaatit akunnerisa arlallit sivisunerpaamilluunniit qaammatialunnguit ingerlaneranni isummerfigisariaqaraa.”

Piffissap pisortani oqartussaasut sulianik suliarinninnerminnut atortagaat pillugu piomasaaqatit Danmarkimi inatsisilerineq pillugu atuakkiani allaaserineqarnerat naggasiutigalugu innersuussutigaara, matumani ilaatigut Niels Fengerip atuakkiaani “Forvaltningsret”-imi (2018-imeersumi) quppernerit 688 tulluilu aamma Jon Andersenip atuakkiaani “Forvaltningsret, Sagsbehandling, Hjemmel, Prøvelse”-mi, qulingiluassaanik (2017-imi) naqitertinneqartumi qupperneq 271 ilaatigut ilanngullugit eqqarsaatigalugit.

3.3.1.2. Naammagittaalliuuteqartarfik pillugu aalajangersakkat sukumiinerusut, matumani sulianik suliarinnittarnera ilanngullugu eqqarsaatigalugu, isumaginnittoqarfiup aqunneqarnera aaqqissuussaanelu pillugit Inatsisartut peqqussutaanni aalajangersarneqarput.

Naammagittaalliuuteqartarfik kommunip isumaginninneq pillugu malittarisassat tunngavigalugit aalajangiinera pillugu naammagittaalliummik suliarinnikkaangami qanoq aalajangiisinnaanersoq malittarisassanik isumaginnittoqarfiup a-

qunneqarnera aaqqissuussaanelalu pillugit Inatsisartut peqqussutaanni inatsisiluniluunniit allani aamma aalajangersaasoqarsimangilaq.

Danmarkimi Ankestyrelsi tassaavoq kommunit ilaatigut isumaginninnermut tunngasuni aalajangiinerinik naammagittaalliuutiginnittarfik. Danmarkimi inatsikkut aalajangersarneqarpoq Ankestyrelsi aalajangiineq naammagittaalliuutigineqartoq eqqarsaatigalugu suliap suliarineqarnissaanik itigartitsilluni, aalajangiinermik atuuttussanngortitsilluni, suliamik suliareqqitassanngortitsilluni utertitsilluni, aalajangiinermik atorunnaarsitsilluni allanngortitsilluniluunniit aalajangiisinnaasoq. Tamanna isumaginninnermut tunngasuni inatsiseqartitsinikkut innarlitsaaliineq aqutsinerlu pillugit inatsit pillugu nalunaarummi nr. 1555-imi, 2. november 2020-meersumi § 68, imm. 2-kkut aalajangersarneqarpoq.

Uanga paasinninnera unaavoq Naammagittaalliuuteqartarfik – kommunit isumaginninnermut tunngasuni aalajangigaanik naammagittaalliuuteqartarfittut – Ankestyrelsimut naligitinneqarsinnaasoq, Naammagittaalliuuteqartarfillu, tamatumma pissuseqataanik, aalajangiinerup naammagittaalliuutigineqartup suliarineqannginnissaanik, atuuttussanngortinneqarnissaanik, suliareqqitassanngortillugu utertinneqarnissaanik, atorunnaarsinneqarnissaanik allanngortinneqarnissaanilluunniit aalajangiisinnaasoq.

Suliap suliareqqitassanngortillugu utertinneqarnissaanik aalajangiinerup manna aallaavittut nassataraa, tassalu aalajangiineq atorunnaarsinneqartoq, oqartussaasorlu alliunerusoq nutaanik aalajangiissasoq. Aalajangiinermik atorunnaarsitsineq isumaqarpoq aalajangiinerup naammagittaalliuutigineqartup inatsiseqartitsinikkut sunniutai atorunnaartut. Taamaattumik aalajangiineq atuussinnaasseeruppoq. Naammagittaalliuuteqartarfiulli suliamik suliareqqitassanngortitsilluni utertitsinissamik aalajangiinermini aalajangersarsinnaavaa aalajangiineq nutaaq aalajangiinermit atorunnaarsinneqartumit inatsiseqartitsinikkut allaasumik sunniuteqassasoq.

Suliaq suliareqqitassanngortillugu utertinneqassasoq aalajangiinerup inatsiseqartitsinikkut sunniutaa eqqarsaatigalugu Danmarkimi inatsiseqartitsineq Danmarkimilu inatsisilerineq pillugu atuakkiaasimasut innersuussutigaaqka, matumani isu-

maginninnermut tunngasuni inatsiseqartitsinikkut innarlitsaaliineq aqutsinerlu pillugit ilitersuummi nr. 9330-mi, 21. marts 2019-imeersumi immikkortoq 279 aamma Niels Fengerip atuakkiaani "Forvaltningsret"-imi (2018-imeersumi) quppernerit 1053 tulluilu ilanngullugit eqqarsaatigalugit.

3.3.2. Inissiineq pillugu suliami suliareqqitassanngortillugu utertinneqartumi piffissaq kommunip suliamik suliarinninnermut atugaanik uanga paasinninnera

Kommunip angajoqqaat aappariit meeraasa sisamat akuersisitsinani angerlarsimaffiup avataanut nukinginnartumik inissinneqarnisaannik aalajangiinera 6. december 2018-imeersaq A-p B-llu Naammagittaalliuuteqartarfirmut 27. december 2018-imi naammagittaalliuutigaat.

Naammagittaalliuuteqartarfik 23. januar 2019-imi aalajangiivoq suliaq kommunip nutaamik suliareqqissagaa nutaamillu aalajangiissasoq.

Kommuni 14. juni 2019-imi ataatsimiinnermi aalajangerpoq A-p B-llu panii akuersisitsinani angerlarsimaffimmik avataanut nukinginnartumik inissinneqassasut. Kommunip aalajangernera A-mut allakkatigut aalajangiinikkut 12. juli 2019-imeersukkut nalunaarutigineqarpoq.

Taamaalilluni uanga paasinninnera unaavoq kommuni inissiisoqarnissaanik aatsaat 12. juli 2019-imi nutaamik aalajangiisimasoq, Naammagittaalliuuteqartarfiup suliamik suliareqqitassanngortitsilluni kommunimut utertitsinerata kingornatigut qaammatit arfinilingajaat qaangiunneranni.

3.3.3. Kommunip suliamik paasinninnera

Kommuni allakkanni 9. september 2020-meersuni qinnuigaara manna paasissutissiisutigeqqullugu, tassalu kommuni nivarsiaqqat inissinneqarnissaannik Naammagittaalliuuteqartarfiup suliamik suliareqqitassanngortitsilluni kommunimut utertitsinissamik 23. januar 2019-imi aalajangiinerata kingornatigut qaammatit arfinilingajaat qaangiunneranni soq aatsaat aalajangiisimansoq.

Kommunip oqaaseqaammini 29. november 2020-meersumi makku uannut oqaatigai:

“Suliap qatanngutigiinnut [D]-mut, [F]-imut [E]-mullu tunngasup suliarinerani angajoqqaajusut suleqatikkuminaattarsimapput, tamannalu pissutigalugu suliaq sivisusimalluni. Angajoqqaat suliamik suliarinnittumik ataatsimeeqateqarnissanut isumaqatigiissutigineqartunut takkuttarsimangillat aalakoortulluunniit kommunimut takkuttarsimallutik, taamatullu aamma angajoqqaatut oqartussaassusilittut marluullutik ataatsimiinnissanut isumaqatigiissutigineqarsimasunut takkutinngikkaangamik, [A] kisiimiilluni malugisimaarluni imigassarsunnillunilu ataatsimiinnernut isumaqatigiissutigineqarsimasunut takkuttarluni.” (Ombudsmandeqarfinni nutsigaavoq)

3.3.4. Uanga naliliinera

Inissiineq pillugu suliaq Naammagittaalliuuteqartarfiup aalajangiinikkut 23. januar 2019-imeersukkut suliareqqitassanngortillugu kommunimut utertippaa. Naammagittaalliuuteqartarfiup aalajangiineranit erserpoq suliaq kommunip nutaamik suliarissagaa nutaamillu aalajangiissasoq, suliasat suliarineqartarnerat pillugu inatsimmi aalajangiineq pillugu piumasaqaatinik eqqortitsisumik.

Aalajangiineq aalajangiinermit atorunnaarsinneqartumit inatsiseqartitsinikkut allaasumik sunniuteqassasoq Naammagittaalliuuteqartarfiup aalajangiinermini aalajangersarsimangilaa. Uanga paasinninnera unaavoq kommunip inissiisoqarnissaanik aalajangiinera 6. december 2018-imeersoq atuussinnaassuseeruttoq, aalajangiinerullu naammagittaalliuutigineqartup inatsiseqartitsinikkut sunniutai atorunnaarsinneqartut.

Uanga paasinninnera unaavoq pisuni akuersisitsinani angerlarsimaffiup avataanut inissiisoqarnissaa pillugu suliamik Naammagittaalliuuteqartarfiup suliareqqitassanngortitsilluni kommunimut utertitsivigisaani taamalu kommunip aalajangiinerata inatsiseqartitsinikkut sunniutaanik atorunnaarsitsivigisaani kommuni saapatit akunnerisa arlallit sivisunerpaamilluuniit qaammatalunnguit ingerlaneranani nutaamik aalajangiisariaqartoq, suliani meeqqap akuersisitsilluni inissinneqarfigisimasaani angajoqqaatullu oqartussaassusermik tigummiqartup meeqqamik

angerlartitsiumalluni qinnuteqarfigisimasaani (inissiinermut akuersinermik tu-nuartitsivigisimasaani) pisarnerup pissuseqataanik.

Suliaq 2019-2 immikkoortumi 3.3.1.1-imi eqqartorneqartoq innersuussutigaara.

Paasinninnera unaavoq kommuni Naammagittaalliuuteqartarfiup suliamik sulia-reqqitassanngortitsilluni kommunimut utertitsinerata kingornatigut suliamik pisa-riaqarneratut pilertortigisumik suliarinnissimananilu inissiisoqarnissaanik pisaria-qarneratut pilertortigisumik nutaamik aalajangiisimangitsoq.

Kommunip uannut 29. november 2020-mi paasissutissiissutigalugu oqaatigaa kommunip inissiineq A-mut aalajangiinikkut 12. juli 2019-imeersukkut nalunaa-rutigineqartoq pillugu aatsaat 14. juni 2019-imi ataatsimiinnermi nutaamik aa-lajangiineranut pissutaasoq tassaasoq angajoqqaanik suleqateqarniarnermi ajor-nartorsiuteqarneq.

Uanga paasinninnera unaavoq suliami matumanisut ittumi Naammagittaalliuu-teqartarfiup suliareqqitassanngortitsilluni kommunip aalajangiinerata amigaati-lerujussuunera tunngavilersuutigalugu utertitsiffigisimasaani kommuni pissutsit immikkut ittut atuutinngippata sapaatit akunnerisa arlallit sivisunerpaamil-luunniit qaammatialunnguit ingerlaneranni nutaamik aalajangiisariaqartoq.

Paasinninnera unaavoq suliami matumani pissutsinik immikkut ittunik Naamma-gittaalliuuteqartarfiup suliamik suliareqqitassanngortitsilluni kommunimut uter-titsinerata kingornatigut qaammatit arfinilingajaat qaangiunneranni kommunip inissiisoqarnissaanik nutaamik aatsaat aalajangiineranut tunngavilersuutaasin-naasunik atuuttoqanngitsoq.

Taamaattumik piffissaq kommunip suliamik suliarinninnerminut atugaa isorisa-rialittut isigaara.

3.4. Angerlarsimaffiup avataanut akuersisitsinani inissiinermik angajoq-qaatut oqartussaassusermik tigummiqartumut nalunaarutiginninneq

3.4.1. Inatsiseqartitsinikkut tunngavigisaq

3.4.1.1. Kommunit angajoqqaatut oqartussaassusermik tigummiqartumik akuersisitsinani inissiinermik (pinngitsaaliisummik inissiinernik) nalunaaruteqartarnerat meeqqanik tapersersuisarneq pillugu inatsimmi § 29, imm. 1-imi oqaaseqatigiitsigut siullertigut imaattunik oqaasertaqartutigut aalajangersaavigineqarpoq:

“§ 29. § 28 malillugu kommunalbestyrelsip angerlarsimaffiup avataanut akuersititseqqaarnani inissiinermik akuersissuteqarneq angajoqqaatut oqartussaassusilimmut imaluunniit meeqqamik isumaginnittuusumut sapinngisamik akunnerit 24-t qaangiut sinnagit nalunaarutigisimassavaa. Nalunaarut inissiinermik aalajangiisoqarnerata sumik tunngaveqarneranik imaqassaaq kiisalu naammagittaalliorsinnaanermut ilitser-suut.”

Meeqqap, angajoqqaatut oqartussaassusermik tigummiqartup meeqqallu isumassorneqarneranik isumaginnittorpiaasup meeraq pinngitsaaliisummik inissinneqassasoq aalajangiisoqarsimaneranik pilertornerpaamik ilisimasaqalersinneqarnissaat meeqqanik tapersersuisarneq pillugu inatsimmi § 29, imm. 1-imi aalajangersakkap qulakkiissavaa. Tamanna meeqqanik tapersersuisarneq pillugu inatsimmi § 29, imm. 1 pillugu immikkut oqaaseqaatinit erserpoq.

3.4.2. Kommunip inissiinernik A-mut B-mullu nalunaaruteqarneranik uanga paasinninera

A-p B-llu meeraasa angerlarsimaffimmik avataanut angajoqqaat aappariit akuersitinnagit inissinneqarnissaannik kommunip aalajangiineri 6. december 2018-imeersoq aamma 12. juli 2019-imeersoq taamaallaat A-mut ingerlatinneqarsimapput.

Naammagittaalliuuteqartarfiup aalajangiineri 23. januar 2019-imeersumi manna kommunimut malugeqqullugu erseqqissumik oqaatigaa, tassalu kommuni angajoqqaanut marluusunut aalajangiissasoq, tassami taakku marluullutik inunnik

nalunaarsuiffimmit (Det Centrale Personregisterimit) paasissutissiissutigineqartut angajoqqaatut oqartussaassusermik tigummiqartuummata.

Taamaalilluni paasinninnera unaavoq A aamma B angajoqqaatut aappariittut meeqqaminnut angajoqqaatut oqartussaassusermik marluullutik tigummiqartuugaluartulluunniit kommunip meeqqanik angajoqqaat aappariit akuersitinnagit angerlarsimafiup avataanut inissiinissamik aalajangiinerit 6. december 2018-imeersoq aamma 12. juli 2019-imeersoq taamaallaat A-mut nalunaarutigisimagai.

3.4.3. Kommunip suliamik paasinninnera

Kommuni allakkanni 9. september 2020-meersuni qinnuigaara kommunip aalajangiinera 6. december 2018-imeersoq kiisalu kommunip aalajangiinera 12. juni 2019-imeersoq A-mut B-mullu tamarmik angajoqqaatut oqartussaassusermik tigummiqartuusunut soq ingerlatinneqarsimannginnersut paasissutissiissutigeqqullugu.

Kommunip oqaaseqaammini 29. november 2020-meersumi uannut oqaatigaa pisuni taakkunani marlunni aalajangiinerit taamaallaat A-mut ingerlatinneqarlutillu nassiunneqarnerat kukkunerusoq, tassami angajoqqaat marluullutik angajoqqaatut oqartussaassusermik ataatsimut tigummiqartuummata.

3.4.4. Uanga naliliinera

Uanga paasinninnera unaavoq A-p B-llu meeraasa angajoqqaat aappariit akuersitinnagit angerlarsimaffimmik avataanut inissinneqarnissaannik aalajangiinerit 6. december 2018-imeersoq aamma 12. juli 2019-imeersoq A-mut B-mullu tamarmik angajoqqaatut oqartussaassusermik tigummiqartuusunut ingerlatinneqarsimasariaqaraluartut.

Kommuni isumaqatigaara oqarmat kommunip angerlarsimaffiup avataanut akuersitsinani inissiisoqarnissaannik kommunip aalajangiinerinik 6. december 2018-imeersumik aamma 12. juli 2019-imeersumik nalunaarutiginninneq eqqarsaatigalugu kukkussuteqarsimasoq.

Aalajangiineq 6. december 2018-meersoq kommunip taamaallaat A-mut nalunaarutigisimammagu tamanna ajuusaarnartutut isigaara.

Kommuni angajoqqaanut marluusunut aalajangiissasoq Naammagittaalliuuteqartarfiup aalajangiinermini 23. januar 2019-imeersumi kommunimut malugeqqullugu oqaatiginninnera eqqarsaatigalugu, kommunip aalajangiinerminik nuutamik 12. juli 2019-imeersumik taamaallaat A-mut nalunaarutiginnissimanagera isorisarialittut isigaara.

4. Angerlartitsiniarneq

4.1. Angerlartitsiumalluni qinnutigisaaq – qanoq iluseqartitsinissamik piunasaqaat

4.1.1. Inatsiseqartitsinikkut tunngavigisaaq

4.1.1.1. Angerlarsimaffiup avataanut inissiineq inissiinermit siunertarineqartoq anguneqarpat, inissiinerup siunertani anguppagu inuusuttorluunniit 18-inik ukioqalerpat unitsinneqassaaq. Tamanna meeqqanik tapersersuisarneq pillugu inatsimmi § 40, imm. 1-ikkut 2-kkullu imaattunik oqaasertalitsigut aalajangersarneqarpoq:

“§ 40. Ikiorssiinissamik suliniuteqarnerit, ikiorssiinissamillu suliniuteqarnerit immikkut ittut kiisalu ikiorssiinissamik suliniuteqarnerit sukannernerit, tak. kapitalini 7-9-ni aalajangersakkat, kiisalu tamakku pillugit suliniuteqareernermit malitseqartitsilluni suliniutit unitsinneqassapput, taakku malillugit sulinermit anguniarneqartut anguneqarpata, imaluunniit ikiorssiinermik suliniuteqarnikkut siunertarineqartut tunngavissaarukkaangata.

Imm. 2. Inatsisartut inatsisaat una malillugu ikiorssiinissamik suliniuteqarnerit kommunalbestyrelsi suliniuteqareernermit malitseqartitsinissamik aallartitsisoqarnissaanik aalajangiingippat, unitsinneqassapput meeraq 18-inik ukioqalerpat takuuk § 42.”

Meeqqamut angerlarsimaffimmi avataanut inissinneqarsimasumut angajoqqaatut oqartussaassusermik tigummiaqartup meeraq angerlartikkumallugu kissaati-

gigini kommunimut nalunaarutigippagu qinnutigisaq akuersaarneqarsinnaanersoq kommuni isummissaaq.

Ingerlatsineq pillugu inatsiseqartitsinermi tunngavinni inatsisikkut aalajangersa-gaanngitsuni oqaatigineqarpoq innuttaasut oqartussaasumut iluseq namminneq kissaatigisartik atorlugu saaffiginnissinnaasut, iluseq taanna atorlugu saaffigin-nissutit oqartussaasup teknikkikkut tigusinnaappagit.

Oqartussaasunut saaffiginnissutit iluseqartitsinissamik aalajangersimasumik, matumani allakkatigoortitsinissamik piumasaqaat ilanngullugu eqqarsaatigalu-gu, eqqortitsisuunissaat oqartussaasup inatsisikkut immikkut tunngavissaqan-gikkuni piumasaqaatigisinnaanngilaa.

Kalaallit Nunaanni Namminersorlutik Oqartussat inatsisilerinermi teknikkikkut tu-naartarisassiaat 2011-mi pingajussaanik naqitertinneqartut innersuussutigaa-ka (tak. immikkoortoq 5.1.1.6). Innuttaasut saaffiginnissutaasa qanoq iluseqar-nissaannik piumasaqaatit pillugit inatsisilerineq pillugu atuakkiaasut innersuus-sutigaaqka, matumani Niels Fengerip atuakkiaani "Forvaltningsret"-imi (2018-i-meersumi) quppernerit 497 tulliilu aamma qupperneq 612 kiisalu Karsten Revs-bechip allallu atuakkiaanni "Forvaltningsret – Sagsbehandling"-imi (2019-imeer-sumi) qupperneq 132 tulliilu ilanngullugit eqqarsaatigalugit.

Angerlartitsinissamik qinnutigisap qanoq iluseqarnissaanik piumasaqaatit pillugit aalajangersakkanik meeqqanik tapersersuisarneq pillugu inatsimmi inatsisini-luunniit allani aalajangersaasoqarsimannngilaq.

4.1.1.2. Pisortat ingerlatsinerat pillugu paasitinneqarsinnaatitaaneq pillugu Inat-sisartut inatsisaanni nr. 9-mi, 13. juni 1994-imeersumi (paasitinneqarsin-naatitaaneq pillugu inatsimmi) § 6, imm. 1-ikkut aalajangersarneqarpoq oqar-tussaasoq paasissutissat suliap aalajangiivigineqarneranut pingaaruteqartut pil-lugit allattuinnissaminut/allakkiornissaminut pisussaaffeqartoq.

Paasitinneqarsinnaatitaaneq pillugu inatsimmi § 6, imm. 1 suliani ataasiinnarmik suliami illua'tungeqartumi aamma atorneqartarpoq, soorlu qinnuteqaatini naam-

magittaalliuutinilu taamaakkajuttartoq. Taamaattumik paasissutissat suliami il-lua'tungiusumit oqaasiinnartigut nalunaarutigineqartut pillugit aamma allattui-soqartartussaavoq. Tamanna paasitinneqarsinnaatitaaneq pillugu inatsimmi § 6, imm. 1 pillugu immikkut oqaaseqaatinit erserpoq.

4.1.2. Kommunip A-p B-llu meeqqatik angerlartikkumallugit qinnutigi-saannik suliarinninneranik paasinninnera

Uanga paasinninnera unaavoq kommunip angajoqqaat aappariit akuersitinnagit angerlarsimaffiup avataanut inissiisimaneq ingerlaannassasoq 6. december 2018-imi aalajangiinerata kingornatigut meeqqamik angerlartinneqarnissaat kissaatigigitsik A-p B-llu oqaasiinnartigut arlaleriarlutik saqqummiuttarsimagaat.

A-p B-llu uannut naammagittaalliummi 3. februar 2020-meersumi ilaatigut makku paasissutissiissutigaat:

“07-12-18 aggersangaavungut, angerlartitsiniarnermi ingerlammat. [...] Iseratta qanoruku oqaleriallartut, maani inissaqanngimmata aqangu [illoqarfimmut Y-mut] aallaerput.”

Illoqarfimmi X-imi isumaginninnermik ingerlatsivimmi sulisup sulisuma ilaannut oqarasuaatikkut 21. februar 2020-mi oqaatigaa A-p B-llu meeqqat angerlartinneqarnissaat qinnuteqaatigisimannigikkaat, angajoqqaalli aappariit meeqqatik angerlaqatigiumagitik arlaleriarlutik oqaatigisarsimagaat.

A aamma B uannut 4. marts 2020-mi imatut allapput:

“Sap. akunnera kingulleq paasiniaavungut angerlartitsiniaaneq qanoq ingerlanersoq. Akineqarpungut angerlartitsiniaanermut tunngasoq qinnutingeqqaartariaqassangipput. Ukiut aappassaannut ingerlavoq qinnutingigatsinguli, nukillaajummernaqaaq allangaqartarningut tamarmik takuneqarsinnaasimangillat.”

A-p B-llu angerlartitsiniarneq pillugu naammagittaalliuutaat kommunimut suliarissanngortillugu aalajangiiffigisassanngortillugulu allakkatigut 4. marts 2020-mi ingerlateqqillugu nassiuppara, kommunimullu oqaatigalugu naammagittaalliuut

angajoqqaat aappariit meeqqamik angerlartinneqarnissaannik qinnuteqaataattut isigigiga.

D-p, F-ip E-llu angerlartinneqarnissaannik A-p B-llu qinnuteqaataat itigartinneqassasoq kommuni 18. juli 2020-mi aalajangiivoq.

4.1.3. Kommunip suliamik paasinninnera

Kommunip oqaaseqaammini 9. oktober 2020-meersumi makku uannut paasisutissiissutigai:

“Piffissami angajoqqaat [illoqarfimmi Y-mi] najugaqarneranni annertunerusumik missiunerup malitseqartitsillunilu ikorfartuiniuteqarnerup ingerlanniernerat kommunimut ajornakusoortorujussuusimavoq. Angajoqqaat sumiiffimmik paasisutissiuumannginnerat pissutiginnarluguluunniit.

Pisut ingerlasimanerat pillugu qulaani oqaatigineqartut pissutsillu paasineqartut pissutigalugit meeqqat angajoqqaavinut angerlartitsiniarnermik aallartitsinissaq kommunip illersorneqarsinnaangitsutut isigisimavaa.” (Ombudsmandeqarfimmi nutsigaa-voq)

Tamatuma kingornatigut kommunip oqaaseqaammini 29. november 2020-meersumi uannut makku paasisutissiissutigai:

“Angajoqqaat aappariit meeqqanik pinngitsaaliisummik inissiinerup kingornatigut qa-
qugukkulluunniit allakkatigut angerlartitsinissamik qinnuteqarsimangillat, kommunili
Ombudsmandimit (allakkanik) 4. marts 2020-mi tigusaqarsimalluni, tassani oqaatigi-
neqarluni kommunip meeqqanik najuisarneq annikillismagaa angerlartitsinissarlu iti-
gartissimallugu. Kisianni angajoqqaajusut [D]-mut, [F]-imut [E]-mullu tunngatillugu
angerlartinneqarnissaannik Avannaata Kommunianut qinnuteqarsimanerannut allak-
katigut takussutissaqanngilaq.” (Ombudsmandeqarfimmi nutsigaa-voq)

Kommunip uannut oqaaseqaataa imatut paasivara kommunip paasinninnera u-
naasoq meeqqap angerlarsimaffimmi avataanut inissinneqarsimasup angerlartin-

neqarnissaa angajoqqaatut oqartussaassusermik tigummiaqartup allakkatigut qinnutigissagaa.

Kommunip uannut oqaaseqaataa aammattaaq imatut paasivara kommunip paasinninnera unaasoq A-p B-llu meeqqamik angerlartinneqarnissaat allakkatigut qinnutigisimangikkaat, taamaattumillu angajoqqaat aappariit angerlartitsinissamik qinnutigisaat kommunip naammagittaalliuut angajoqqaat aappariit angerlartitsinissamik qinnutigisaattut 4. marts 2020-mi ingerlatitseqqillunga kommunimut nassiussinerma kingornatigut aatsaat suliarisimagaa.

4.1.4. Uanga naliliinera

Uanga paasinninnera unaavoq kommuni aatsaat inatsimmi immikkut tamatumunga tunngavissaqaruni meeraq angerlarsimaffimmi avataani inissinneqarsimasoq angerlartikkumallugu qinnutigisap allakkatigut tunniunneqarnissaa piusasaqaatigisinnaagaa. Kommuni tunngavissamik taamaattumik peqanngitsoq takuneqarsinnaavoq.

Uanga paasinninnera aammattaaq unaavoq meeqqamut angerlarsimaffimmi avataani inissinneqarsimasumut angajoqqaatut oqartussaassusermik tigummiaqartup meeraq angerlartikkumallugu oqaasiinnartigut qinnutigippagu kommuni suliami tamanna pillugu allattuinnissaminut paasitinneqarsinnaatitaaneq pillugu inatsimmi allattuisussaataaneq pillugu aalajangersakkat tunngavigalugit pisussaaffeqartoq.

Qulaani oqaatigineqartutut uanga paasinninnera unaavoq angajoqqaat aappariit meeraasa angerlarsimaffimmik avataanut inissinneqarnissaannik kommunip 6. december 2018-imi aalajangiinerata kingornatigut meeqqat angerlartinneqarnissaannik kissaateqarnertik A-p B-llu kommunimut oqaasiinnartigut arlaleriarlutik saqqummiuttarsimagaat.

Uanga paasinninnera aammattaaq unaavoq angajoqqaat aappariit meeqqat angerlartinneqarnissaannik qinnutigisaat kommunip angajoqqaat aappariit naammagittaalluutaannik angerlartitsinissamik qinnutigisaattut 4. marts 2020-mi i-

ngerlatitseqqillunga nassiussinerma kingornatigut aatsaat suliarisimagaa suliani-
lu 18. juli 2020-mi aalajangiisimasoq.

Uanga naliliinera unaavoq meeqqat angerlartinneqarsinnaanersut A-p B-llu
meeqqamik angerlartinneqarnissaannik qinnutigisaat taassuma allakkatigut o-
qaasiinnartigulluunniit saqqummiunneqarnera apeqqutaatinnagu kommunip i-
summerfigisussaagaa.

A-p B-llu meeraat angajoqqaat aappariit tamatuminnga oqaasiinnartigut qinnuti-
gisaat tunngavigalugit angerlartinneqarsinnaanersut kommunimit isummerfigi-
neqarsimanninnera isorisarialittut isigaara.

4.2. Piffissaq kommunip sulianik suliareqqitassangorlugit utertinneqar- tunik suliarinninnerminut atugaa

4.2.1. Inatsiseqartitsinikkut tunngavigisaq

4.2.1.1. Meeraq angerlartinneqarsinnaanersooq aalajangiinnginnermini kommu-
nip pissutsit arlallit misissortussaavai paasissutissallu erseqqinnerusumik taane-
qartut pissarsiariniartussaallugit. Tamanna meeqqanik tapersersuisarneq pillugu
inatsimmi § 41-kkut aalajangersarneqarpoq.

Angajoqqaatut oqartussaassusermik tigummiaqartup meeraq angerlarsimaffim-
mi avataanut inissinneqarsimasooq angerlartikkumallugu qinnutigippagu kommu-
nip qanoq pilertortigisumik aalajangiisarnissaanut immikkut piffissaliussanik
meeqqanik tapersersuisarneq pillugu inatsimmi aalajangersaasoqarsimannigilaq.

Piffissaq oqartussaasut sulianik suliarinninnermut atortagaat pillugu ataatsimut
malittarisassanik aammattaq aalajangersaasoqarsimannigilaq, suliassat suliari-
neqartarnerat pillugu inatsimmi inatsisiniluunniit allani.

Meeqqap angerlarsimaffimmi avataani akuersisitsilluni inissinneqarsimasup a-
ngerlartinneqarnissaanik qinnutigisaq kommunip qanoq pilertortigisumik suliari-
sariaqaraa siusinnerusukkut oqaaseqaammi 2019-2-mi isummerfigaara.

Taamaalillunga suliami 2019-2-mi oqaatigaara suliani meeqqap angerlarsimafimmi avataani akuersisitsilluni inissineqarsimasup angerlartinneqarnissaanik angajoqqaatut oqartussaassusermik tigummiaqartup qinnuteqarfigisaani qinnutigineqartoq akuerineqarsinnaanersoq kommunip sapaatit akunnerisa arlallit sivi-sunerpaamilluunniit qaammatalunnguit ingerlaneranni kommunip isummerfigisariaqaraa.

4.2.2. Piffissamik kommunip sulianik suliareqqitassangorlugit utertinneqartunik suliarinninnerminut atugaanik uanga paasinninnera

A-p B-llu meeraasa sisamat akuersisitsinani angerlarsimaffimmik avataani inissineqarsimanerat ingerlaqqissasoq kommuni 6. december 2018-imi aalajangiivoq.

A-p B-llu uannut naammagittaalliummi 3. februar 2020-meersumi ilaatigut makku paasissutissiissutigaat:

“07-12-18 aggersangaavungut, angerlartitsiniarnermi ingerlammat. [...] Iseratta qanoruku oqaleriallartut, maani inissaqanngimmata aqangu [illoqarfimmut Y-mut] aallalerput.”

Illoqarfimmi X-imi isumaginninnermik ingerlatsivimmi sulisup sulisuma ilaannut oqarasuaatikkut 21. februar 2020-mi oqaatigaa A-p B-llu meeqqat angerlartinneqarnissaat qinnuteqaatigisimangikkaat, angajoqqaalli aappariit meeqqatik angerlaqatigiumagitik arlaleriarlutik oqaatigisarsimagaat.

A aamma B 4. marts 2020-mi uannut imatut allapput:

“Sap. akunnera kingulleq paasiniaavungut angerlartitsiniaaneq qanoq ingerlanersoq. Akineqarpungut angerlartitsiniaanermut tunngasoq qinnutingeqqaartariaqassangipput. Ukiut aappassaannut ingerlavoq qinnutingigatsinguli, nukillaajummernaqaaq allanqaqartarningut tamarmik takuneqarsinnaasimangillat.”

A-p B-llu ilaatigut angerlartitsiniarneq pillugu naammagittaalliuutaat kommunimut suliarisassanngortillugu aalajangiiffigisassanngortillugulu allakkatigut 4. marts 2020-mi ingerlateqqillugu nassiuppara, kommunimullu oqaatigalugu naammagittaalliuut angajoqqaat aappariit panimmik angerlartinneqarnissaannik qinnuteqaataattut isigigiga.

D-p, F-ip aamma E-p angerlartinneqarnissaannik A-p B-llu qinnuteqaataat itigartinneqassasoq kommuni 18. juli 2020-mi aalajangiivoq.

Uanga paasinninnera unaavoq meeqqat angerlartinneqarnissaat kissaatigigitsik A-p B-llu piffissami 6. december 2018-imit 4. marts 2020-p tungaanut kommunimut oqaasiinnartigut arlaleriarlugu oqaatigisarsimagaat, kommunillu angerlartitsiniarnermik suliat aatsaat suliaralugillu 18. juli 2020-mi aalajangiiffigisimagai.

4.2.3. Kommunip suliamik paasinninnera

Kommuni allakkanni 9. september 2020-meersuni qinnuigaara kommuni suliani angerlartitsiniarnermut tunngasuni sooq aatsaat 18. juli 2020-mi aalajangiisi-manini paasissutissiissutigeqqullugu.

Uanga paasinninnera unaavoq tamanna kommunip uannut oqaaseqaammini 29. november 2020-meersumi imaluunniit kommunip oqaaseqaatigigallagara pillugu oqaaseqaammini 30. juni 2021-meersumi akisimanngikkaa.

4.2.4. Uanga naliliinera

Piffissamik suliap suliarineqarneranut atorneqartumik naliliininni ilaatigut manna pingaartillugu isiginiarpara, tassalu angajoqqaat meeqqat angerlartinneqarnissaat kissaatigigitsik aappariit piffissami ulloq 6. december 2018-imit 4. marts 2020-p tungaanut kommunimut oqaasiinnartigut arlaleriarlutik saqqummiuttarsimagaat.

Manna aammattaaq pingaartillugu isiginiarpara, tassalu suliat angerlartitsiniarnermut tunngasut suliamik suliarisassanngortitsillunga aalajangiiffigisassanngor-

titsillungalu kommunimut ingerlatitseqqillunga 4. marts 2020-mi nassiussinerma kingornatigut kommunip aatsaat qisuariarfigalugillu 18. juli 2020-mi aalajangiivigisimagai.

Kiisalu manna pingaartillugu isiginiarpara, tassalu angerlarsimaffiup avataanut inissiineq angajoqqaatut oqartussaassusermik tigummiagaqartup isumaqatiginngisaa akuliunnertut annertoorujussuurtut isigineqartariaqartoq.

Suliani meeqqap angerlarsimaffimmi avataani akuersisitsilluni inissinneqarsimasup angerlartinneqarnissaanik angajoqqaatut oqartussaassusermik tigummiagaqartup qinnuteqarfigisimasaani angajoqqaatut oqartussaassusermik tigummiagaqartup inissiinermut akuersinera atorunnaartutut isigineqartarpoq. Taamaatumik meeqqap angerlarsimaffimmi avataanut inissinneqarnissaanik kommunip aalajangiineranut tunngaviusoq atorunnaarsimasutut isigineqartariaqarpoq. Suliani taakkunani angerlartitsineq akuerineqarsinnaanersoq kommunip sapaatit akunnerisa arlallit sivisunerpaamilluunniit qaammatalunnguit ingerlaneranni isummerfigisariaqarpaa.

Uanga paasinninnera unaavoq piffissaq kommunip sulianik angajoqqaatut oqartussaassusermik tigumminnittup meeqqamik angerlarsimaffimmi avataani akuersisitsinani inissinneqarsimasumik angerlartitsiumalluni qinnuteqarfigisimasaanik suliarinninnerminut atugaa kommunip sulianik meeqqap akuersisitsilluni inissinneqarfigisimasaanik suliarinninnerminut atortagaanit sivisunerungaartariaqanngitsoq.

Uanga tamanna tunngavigalugu naliinera unaavoq piffissaq kommunip angerlartitsiniarneq pillugu sulianik suliarinninnerminut atatillugu atugaa isorisarialiusimasoq.

5. Angerlartitsiniarneq pillugu suliap suliarineqarneranik unitsitsineq

5.1. Inatsiseqartitsinikkut tunngavigisaq

5.1.1. Kommunalbestyrelsi tassaavoq meeqqap angerlarsimaffimmi avataanut inissinneqarnissaanik aalajangiisarlunilu meeqqap inissinneqarsimasup angerlartinneqarnissaanik aalajangiisartoq. Tamanna meeqqanik tapersersuisarneq pillugu inatsimmi §§-tigut 5-ikkut, 27-kkut, 28-kkut aamma 40-kkut aalajangersarneqarpoq.

Angajoqqaatulli oqartussaassusermik tigummiaqartoq meeqqap angerlarsimaffimmi avataani inissinneqarnerata kingornatigut kommunimut allamut nuuppat kommunalbestyrelsi sorleq aalajangiissanersaq aalajangersakkani taakkunani takuneqarsinnaanngilaq.

Tamanna innuttaasut pisinnaatitaaffiinut toqqartumik sunniuteqanngilaq, apeqqulli suliap meeqqanik angerlarsimaffimmi avataanut inissinneqarsimasumik angerlartitsiniarnermut tunngasup kommunimit sorlermit aalajangiivigineqarnissaanut ilaatigut sunniuteqarluni.

5.1.1.1. Angajoqqaatut oqartussaassusermik tigummiaqartoq meeqqap angerlarsimaffimmi avataanut inissinneqarnerata kingornatigut kommunimut allamut nuuppat kommunip sorliup inissiineq ingerlaqqissanersaq atorunnaarsinneqassanersorluunniit naliliisussaananeramik apeqqut eqqarsaatigalugu kommunit akunnerminni akiliiffigeqatigiittarnissamut pisussaaffii pillugit Inatsisartut peqqussutaat nr. 2, 12. juni 1995-imeersoq siusinnerusukkut suliami 2018-4-mi inner-suussutigaaara.

Suliami 2018-4-mi isumaqarpunga meeqqanik inuusuttunillu ikiorsiisarneq pillugu peqqussut 2003-meersoq taamani atuuttoq tunngavigalugu ikiorsiineq kommunit akunnerminni akiliiffigeqatigiittarnissamut pisussaaffii pillugit Inatsisartut peqqussutaanni pineqartunut aamma ilaatinneqartoq.

Uanga paasinninnera unaavoq meeqqanik inuusuttunillu meeqqanik tapersersuisarneq pillugu inatsit massakkut atuuttoq meeqqanik ikiorsiisarneq pillugu peqqussummik 2003-meersunik taarsiisoq tunngavigalugu ikiorsiineq kommunit akunnerminni akiliiffigeqatigiittarnissamut pisussaaffii pillugit Inatsisartut peqqussutaanni pineqartunut aamma ilaatinneqartoq.

Kommuni sorleq meeqqanik inuusuttunillu ikiorsiissanersoq pillugu kommunit akunnerminni akiliiffigeqatigiittarnissamut pisussaaffii pillugit Inatsisartut peqqussutaanni § 10, imm. 1-ikkut makku aalajangersarneqarput:

“§ 10. Meeqqanik inuusuttunillu ikiorsiisarneq pillugu Inatsisartut peqqussutaat tunngavigalugu ikiorsiissutigineqartut meeqqap inuusuttulluunniit kommunitut najugarivitaanit akiliisussaviutigisumit tunniunneqartassapput.”

Kommuni sorleq meeqqap inuusuttulluunniit kommunitut najugarivitarineraa pillugu kommunit akunnerminni akiliiffigeqatigiittarnissamut pisussaaffii pillugit Inatsisartut peqqussutaanni § 11, imm. 1-imi oqaaseqaatigiitsigut siullertigut makku aammattaaq aalajangersarneqarput:

“§ 11. Meeqqat inuusuttullu 18-it inorlugit ukiullit katissimannngitsut angajoqqaatut oqartussaassuseqartoq/-tut arlaat Kalaallit Nunaanni najugaqavissuuppat taanna kommunitut najugarivitaqatigissavaa.”

Kommunit akunnerminni akiliiffigeqatigiittarnissamut pisussaaffii pillugit Inatsisartut peqqussutaanni § 13, imm. 1-ikkut 2-kkullu makku aalajangersarneqarput:

“§ 13. Meeraq inuusuttorluunniit pisortat suliniuteqarnerisigut angerlarsimaffiup avataanut inissinneqarsimappat meeqqap inuusuttulluunniit inissinneqarnerata nalaani kommunitut najugarivita inissiinerup ingerlanerata nalaani meeqqanut inuusuttunullu ikiorsiissutit pillugit Inatsisartut peqqussutaat tunngavigalugu aningaasartuutitut akiliisussavittut isigineqassaaq.

Imm. 2. Angajoqqaatut oqartussaassuseqartup aappaa meeqqap inuusuttulluunniit kommunitut najugarivitaqatigisaa inissiisimanerup nalaani allamut nuuppat angajoqqaatut oqartussaassuseqartup kommunitut najugarivitariligaa meeraq inuusuttorluunniit pillugu paasissutissat allattukkat (journalit) kommunimi nuuffigisami tiguneqarneranniit kommunitut akiliisussavittut isigineqalissaaq.”

Kommunit akunnerminni akiliiffigeqatigiittarnissamut pisussaaffii pillugit Inatsisartut peqqussutaanni § 13, imm. 2 oqaasertalerneqarnermigut pisumi meeq-

qamut angerlarsimaffimmi avataanut inissinneqarsimasumut angajoqqaatut o-qartussaassutsimik tigummiqartup kommunimut allamut nuunnerani kommuni akiliisussaasoq pillugu apeqqut kisiat aalajangersaavigaa.

Aalajangersagarli taanna pillugu immikkut oqaaseqaatinit erserpoq kommuni nuuffiusoq meeqqap ikiorserneqarnissaa pillugu aalajangiinissamut pisinnaati-taasoq, matumani inissiineq ingerlaqqissanersoq, allanngortinneqassanersoq pif-fissarluunniit nuuffiusoq aallarnerfigalugu atorunnaassanersoq apeqqut ilanngul-lugu eqqarsaatigalugu, kisianni kommunip nuuffigineqartup meeraq pillugu alla-gaanik/nalunaarsukkanik kommunimit qimatamit tigusaqareernerata kingorna-tigut aatsaat.

5.1.1.2. Meeqqanik tapersersuisarneq pillugu inatsimmi kommunip meeqqanik kommunimiittunik nakkutilliinissaa pillugu ilaatigut makku § 8, imm. 1-ikkut 2-kkullu aalajangersarneqarput:

“§ 8. Kommunalbestyrelse meeqqat inuunermi atugarisaannik nakkutilliis-saaq. Nakkutilliineq ornigunnikkut paasiniaanikkullu ingerlanneqartassaaq, taamaa-lilluni kommunimi meeqqamik ikiorserneqarnissamik pisariaqartitsisumik sapinngisa-mik siusissukkat kommunalbestyrelsi ilisimaarinnilerniassamat.

Imm. 2. Kommunalbestyrelsip meeqqamut pineqartumut angerlarsimaffiup avataa-nut inissinneqarsimasumut nakkutilliineq ingerlattassavaa.”

Meeqqanik tapersersuisarneq pillugu inatsimmi § 8, imm. 2 pillugu immikkut oqaaseqaatinit makku erserput:

“B) Meeqqat angerlarsimaffiup avataanut kommunimut allamut inissinneqartut Meeraq Kalaallit Nunaanni kommunimi allami inissinneqarsimappat, kommunalbesty-relsip (kommunip angerlarsimaffigisap) isumagissavaa meeqqap inissinneqarfigisaani najugarisaanilu inummut sammititamik nakkutilliisoqarnissaa. Angerlarsimaffiup ava-taanut kommunip angerlarsimaffigisap avataaniittumut kommunimut allamut meeqqat inissinneqartut pillugit inummut sammititamik nakkutilliinissamik ingerlatsinissaq pillugu kommunalbestyrelsip suleqatigiinnissaq toqqarsinnaavaa. Pingaartortaa tas-saavoq nakkutilliisussaataaneq taamaatinneq ajormat, kommunip killeqarfiisa ava-taanut meeqqap inissinneqarnera pissutiginnarlugu.”

Meeqqanik tapersersuisarnek pillugu inatsimmi kommunit imminnut nalunaarfigeqatigiittarnissaat pillugu ilaatigut makku § 17, imm. 1-ikkut aamma 3-kkut aalajangersarneqarput:

“§ 17. Ilaqutariit 18-it inorlugit ukiulimmik meerallit kommunimiit kommunimut allamut nuuppata, meerarlu immikkut ikiorserneqarnissamik pisariaqartitsisutut kommunip qimanneqartup isumaqarfigiguniuk, Inatsisartut inatsisaat una tunngavigalugu tamanna pillugu kommuni qimanneqartoq kommunimut nuuffigineqartumut allaganngorlugu nalunaaruteqassaaq.

Imm. 2. [...]

Imm. 3. Imm. 1 imaluunniit 2 malillugit nalunaaruteqarnermut atatillugu, suliamut attuumassuteqartut kommunip qimanneqartup nassitissavai, tassunga ilanngullugit kommunip qimanneqartup naliliinerminut tunngavigisimasai paasissutissat attuumassuteqartut eqikkarneri.”

Meeqqanik tapersersuisarnek pillugu inatsimmi § 17, imm. 1 pillugu immikkut oqaaseqaatinit makku erserput:

“Aalajangersagaq pinngitsoorani atuutsitsissaaq, kommunimi qimatami meeqqamut ikiorsiisoqareeraluarpat ikiorsiisoqanngikkaluarpalluunniit.

Nalunaarutip imarissavaa ikiorsiisoqarnissamik pisariaqartitsisoqarneranik ilimagisarluni nalunaaruteqartoqarsimanera.”

Meeqqanik tapersersuisarnek pillugu inatsimmi § 17, imm. 3 pillugu immikkut oqaaseqaatinit makku aammattaq erserput:

“Aalajangersakkap qularnaassavaa paasissutissat pingaarutillit ilanngullugit nassiunneqarnissaat, taamaasilluni kommune nuuffigineqartoq ajornartorsiutip suuneranik sillimareersinnaaniassammat kiisalu ikorfartuinissamik aallarnisaalluni. Aalajangersakkami paasissutissanik nutaanik katersisoqarnissaanik piunasaqaateqanngilaq, taamaallaalli paasissutissat kommunimit nuuffigisamit ilanngullugit nassiunneqartut kisiimik. Allagaatit tassaasinnaapput iliuuseqarnissamut pilersaarutit, oqarasuaammiit nalunaarsukkat, ilaqutariit suleqatiginnikkusunnerannik naliliinerit il.il.”

5.1.1.3. Qitiusumik Inunnik Nalunaarsuiffimmi (CPR-imi) najugaqarfinnik nalunaarsuisarneq pillugu malittarisassat Qitiusumik Inunnik Nalunaarsuiffik (Det Centrale Personregister) pillugu inatsisip Kalaallit Nunaannut atuutilersinneqarnissaanik peqqussummi nr. 1198-imi, 29. november 2006-imeersumi (matuma kingornatigut CPR pillugu inatsimmik taaneqartartussami) aalajangersarneqarput.

Makku CPR pillugu inatsimmi § 6, imm. 1-ikkut aalajangersarneqarput:

“**§ 6.** Kommunalbestyrelsi CPR-imi kikkunnik tamanik kommunimi najugaannut nalunaarsuisoqassaaq, pineqartut kapitalit 4-6 malillugit nunami maani nalunaarsugasaaappata. Najukkamik oqarnermi pineqarpoq sumiiffik (inigisaq), inuup amerlanertigut sulinggiffeqarnek, suliamut atasumik angalaneq, napparsimaneq assigisaalluunniit pisutigalugit qimagussimagallassanngikkaangami siniffigisagaa aamma pigisaqarfigisaa.”

Makku CPR pillugu inatsimmi § 10, imm. 1-imit aammattaaq erserput:

“**§ 10.** Kommunalbestyrelsi inuup najukkami eqqortumik nalunaarsorneqannginneranik pasitsaassisoq kukkunerujunnartut aaqiivigiumallugit tamatumunnga misissuisaaq. Pineqartup nalunaarsorneqarfigisimasaani kommunalbestyrelsiusooq misissuisuussaaq, kommunimi allami najugaq aalajangersimasooq pineqartumit najorallarneqartutut ilisimaneqanngippat. Kingullertut pisoqartillugu tassani kommunalbestyrelsi misissuisuussaaq.”

Inunnik nalunaarsuisarneq pillugu ilitsersuummit nr. 9273-imit, 14. juni 2013-imeersumit erserpoq inuup najugaqarfia eqqortumik nalunaarsorneqarsimanngitsoq kommunip pasitsaappagu kommuni iliuuseqarnissamut CPR pillugu inatsimmi § 10, imm. 1-ip pisussaaffileraa. Taamaalilluni ilitsersuummi immikkoortumit 3.7.1-imit pinngitsaaliilluni nuutsitsinermut tunngasumit makku erserput:

“CPR pillugu inatsisip siunertaasa ilaat tassaavoq kialuunniit najugaqarfimmi pineqartup najugaqarfippiaani uninngavigisarpiaaniluunniit nalunaarsorneqarsimanissaanik qulakkeerinnineq, tak. inatsimmi § 1, nr. 3.

Inuup najugaqarfia eqqortumik nalunaarsorneqarsimanngitsoq kommunip pasitsaap-pagu kommuni iliuuseqarnissaanut inatsimmi § 10, imm. 1-imi aalajangersakkap pi-sussaaffilerpaa. Tamatumunnga atatillugu oqaatigineqassaaq innuttaasup CPR-imi (inunnik nalunaarsuiffimmi) najugaqarfia inatsimmi arlalippassuarni taassuma eqqor-tumik nalunaarsorneqarsimanera tatigalugu pingaaruteqartutut isigineqarmat.

Pasitsaassinerup qanoq pilersimanera apeqqutaanngilaq. Kukkusumik nalunaarsuine-rup kinaassuseq isertuullugu nalunaarutigineqarnera pisut qanoq issusiat apeqquta-tillugu misissuineramik aallartitsinermut tunngaviusinnaavoq.

Kommuni inuup pineqartup (kukkusumik) nalunaarsorneqarfia aallaavittut tassaavoq suliamik misissuisussaq aalajangiisussarlu. Pineqartorli kommunimi allami najugaqar-fimmi aalajangersimasumi nalunaarsorneqarsimasoq pasitsaassisoqarpat kommuni al-la taanna tassaavoq suliamik misissuisussaq aalajangiisussarlu, tak. inatsimmi § 10, imm. 1." (Ombudsmandeqarfimmi nutsigaavoq)

5.2. Kommunip sulianik angerlartitsiniarnermut tunngasunik suliarinnin-nerminik unitsitsineranik uanga paasinninnera

Suliamut atatillugu suliami allagaatinit erserpoq A aamma B 2019-ip naalernerani illoqarfimmut Y-mut nuussimasut.

Aammattaaq erserpoq angajoqqaat aappariit aalajangersimasumik illoqarfimmi Y-mikkunik illoqarfimmi Y-mi najugaqartutut nalunaarsortissasut kommunip A-mut B-mullu arlaleriarluni paasissutissiissutigisarsimagaa.

Uanga paasinninnera unaavoq suliat angajoqqaat aappariit meeqqamik angerlar-tinneqarnissaannik qinnutigisaannut tunngasut kommunip angajoqqaat aap-pariit aalajangersimasumik illoqarfimmi Y-miinnerat pissutigalugu suliarinnaan-gikkaat, taamaattumillu suliat Kommuneqarfik Sermersuumit suliarineqartaria-qartut kommunip A-mut B-mullu oqaasiinnartigut nalunaarutigisimagaa.

Paasinnera aammattaaq unaavoq A-p B-llu najugaqarnerisa nalunaarsorneqarsi-manerat Kommuneqarfik Sermersuumut najugaqartutut allannngortinniarlugu kommunip ulloq 18. marts 2021-mi aalajangersimagaa, aalajangiinerlu Kommu-

neqarfik Sermersuumut nassiussimagaa najugaq ullorlu nuuffigisaq eqqortoq nassaariniqqullugit Kommuneqarfik Sermersuumut qinnuiginninnertalimmik nassiullugu.

Tamatuma saniatigut uanga paasinninnera unaavoq A-p B-llu najugaqarnerannik nalunaarsuinerup Kommuneqarfik Sermersuumut allanngortinneqarnissaa pillugu ulloq 23. marts 2021-mi aalajangernerme kingorna A-p B-llu meeraasa innissinneqarnerat il.il. pillugit suliani allagaatit tamaasa kommunip Kommuneqarfik Sermersuumut aatsaat nassiussimagai.

Kiisalu uanga paasininnera unaavoq Kommuneqarfik Sermersuumut paasininnera unaasoq A aamma B illoqarfimmut X-imut uterlutik nuussimasut, taamaattumillu A-p B-llu meeraasa innissinneqarnerat il.il. pillugit suliani allagaatit Kommuneqarfik Sermersuumut 23. april 2021-mi kommunimut utertillugit nassiussimagai.

5.3. Kommunip suliamik paasinninnera

Kommuni allakkanni 29. oktober 2020-meersuni aamma 28. januar 2021-meersuni qinnuigaara kommunip sulianik meeqqat angerlartinniarneqarnerannut tunngasunik suliarinninnerminik unitsitsinera pillugu A-mut B-mullu nalunaarutaata assilinera uannut nassiuteqqullugu.

Kommunip uannut kingusinnerusukkut allakkamini 9. februar 2021-meersumi makku paasissutissiissutigai:

“Avannaata Kommuniata angajoqqat Kommuneqarfik Sermersuumut saaffiginnissasut nassuiaappai, taamaalilluni angerlartitsiniarneq suliarineqarsinnaaqqullugu. Kommunip [illoqarfimmi Y-mi] massakkut najugaqarfik pillugu paasissutissat paasissutissallu allat angerlartitsiniarnermik suliarinninnermut ilaasut amigaatigai, tak. meeqqat tapersorsorneqarnissaannut Inatsisartut inatsisaanni nr. 20-mi, 26. juni 2017-meersumi § 41 angerlartitsiniarnerup atorunnaarsinneqarneranut tunngasoq.” (Ombudsmandeqarfimmi nutsigaavoq)

Kommuni oqaaseqaatigallakkakka pillugit oqaaseqaammini uannut allakkatigut
30. juni 2021-meersutigut imatut paasissutissiivoq:

"Najugaqarfiup allanngornera eqqarsaatigalugu Avannaata Kommuniata paasissutissiissutigisinnaavaa [A]-p [B]-llu najugartik allanngorteqqullugu kommunimit arlaleriarlutik qinnuigineqarsimasut, taamaalilluni najugaqarfik Inunnik Nalunaarsuiffimmi pisisusiviusut naapertorlugit allassimasinnaaqqullugu. [A] aamma [B] suli taamaaliungimmata Avannaata Kommunია ulloq 18. marts 2021-mi aalajangiivoq Qitiusumik Inunnik Nalunaarsuiffik (Det Centrale Personregister) pillugu inatsisip atuutilersinneqarnissaanik peqqussut nr. 11, 29. november 2006-imeersoq naapertorlugi najugaqarfiup allanngortinneqarnissaanik aalajangiivoq, taamaalilluni najugaqarfik Kommuneqarfik Sermersuumut allanngortinneqarluni. Aalajangiineq aammattaaq Kommuneqarfik Sermersuumut nassiunneqarpoq, najugaqarfik eqqortoq ullorlu nuuffiusoq nasaariniaqqullugit qinnuiginnissummik ilaqartumik.

[...]

Tamatuma saniatigut meeqqat inissinneqarnerat angajoqqaallu meeqqanik najuisinnaanerat il.il. pillugit suliami allagaatit tamaasa Avannaata Kommuniata ulloq 23. marts 2021-mi meeqqat tapersersorneqarnissaannut Inatsisartut inatsisaanni nr. 20-mi, 26. juni 2017-imeersumi § 17 kiisalu kommunit akunnerminni akiliiffigeqatigiitarnissamut pisisaaffii pillugit Inatsisartut peqqussutaanni nr. 2-mi, 12. juni 1995-imeersumi § 13, imm. 2 naapertorlugit Kommuneqarfik Sermersuumut nassiuppai.

Ulloq 23. april 2021-mi Kommuneqarfik Sermersuup suliami allagaatit utertillugit nassiuppai.

Kommuneqarfik Sermersuup tamatumunnga malitsigitillugu allakkani oqaatigaa:

"Kommuneqarfik Sermersuumi Meeqqanut Ilaqutariinnullu Ingerlatsiviup [...] pillugu suliaq matuniarlugu aalajangerpoq, tamatumani tunngavilersuutigalugu angajoqqaatut oqartussaassusermik tigummiartuusut [A]-p [B]-llu [illoqarfimmi X-imi] najugaqarnerat.

Suliami allagaatit [illoqarfimmi X-imi] Meeqqanut Ilaqutareeqarnermullu Ingerlatsivimmit Kommuneqarfik Sermersuumi Meeqqanut Ilaqutariinnullu Ingerlatsivimmut nassiunneqartut matumuuna utertinneqarput.

Ilisimatitsissutigineqassaaq inuusuttoq pillugu paasisutissat kingulliit sapinngisamik piaartumik nassiunneqassammata.

[...]”

5.4. Uanga naliliinera

Meeqqanik tapersersuisarnek pillugu inatsisikkut aalajangersarneqarpoq kommunip pissutsinik meeppaat kommunimi kommunillu avataani atugaannik ataatsimut nakkutiginninnissaminut pisussaaffeqartoq. Kommunip sumiiffimmi meeppap inissinneqarfigisaani inummut sammititaasumik nakkutilliinissani aammattaaq pisussaaffigaa. Kommunip nakkutilliisussaataitanera meeppap kommunimi allami najugaqalerluni inissinneqarsimanera pissutigalugu atorunnaarneq ajorpoq.

Meeqqanik tapersersuisarnek pillugu inatsimmi § 8, imm. 1 aamma 2 taakkualu pillugit oqaaseqaatit innersuussutigaaq.

Uanga paasinninnera unaavoq tapersersuineq meeppanik tapersersuisarnek pillugu inatsimmi aalajangersakkat tunngavigalugit aallartinneqarsimasoq kommunip nakkutilliisussaataitanerminut ilaatillugu ingerlaavartumik naliliiffigisassagaa, matumani meeppanik tapersersuisarnek pillugu inatsimmi § 40. imm. 1 tunngavigalugu suliniutigineqartoq unitsinneqassanersoq ilanngullugu eqqarsaatigalugu.

Uanga paasinninnera aammattaaq unaavoq kommunip qimataq meeppap ikiorserneqarnissaa pillugu aalajangiinissamut pisinnaatitaasoq, matumani inissiineq ingerlaqqissanersoq, allanngortinneqassanersoq unitsinneqassanersorluunniit ilanngullugit eqqarsaatigalugit. Pisinnaatitaaneq taanna meeraq pillugu allagaatit/allattukkat kommunip nuuffiusup kommunimit qimatamit tiguppagit aatsaat allanngortinneqassaaq.

Kommunit akunnerminni akiliiffigeqatigiittarnissamut pisussaaffii pillugit Inatsisartut peqqussutaanni § 13, imm. 2 innersuussutigaaq.

Inuup najugaqarfia eqqortumik nalunaarsorneqarsimanngitsoq kommunip malugiguniuk pasitsaakkuniulluunniit suliap misissornissaa pisussaaffigaa kukkusumillu nalunaarsuisimanerusinnaasut aqqissallugit.

CPR pillugu inatsimmi § 10, imm. 1 aamma inunnik nalunaarsuisarneq pillugu ilitsersuummi nr. 9273-imi, 14. juni 2013-imeersumi immikkoortoq 3.7.1 inner-suussutigaa.

Uanga paasinninnera unaavoq angajoqqaat aappariit 2019-ip naalernerani illoqarfimmut Y-mut nuussimasut kommunip paasigamiuk A-p B-llu panii pillugit suliani allattuiffiit kommunip Kommuneqarfik Sermersuumut nassiussimasariaqaralarai, Kommuneqarfik Sermersuup suliamik suliarinninnermik tigusinissaa siunertaralugu.

Uanga paasinninnera aammattaaq unaavoq angajoqqaat aappariit 2019-ip naalernerani Nuummumut nuussimasut kommunip paasigamiuk A-p B-llu najugaqarfiannik nalunaarsuineq CPR pillugu inatsimmi tamanna pillugu aalajangersakkat tunngavigalugit misissorsimasariaqaralaraa, angajoqqaallu aappariit najugaqarfiannik nalunaarsuineq pillugu pisariaqarneratut aalajangiisimasariaqaraluartoq imaluunniit suliaq najugaqarfeqarnermut tunngasoq ingerlateqqillugu Kommuneqarfik Sermersuumut nassiussimasariaqaralaraa.

Kommunip suliani allagaatit tamatumunnga peqatigitillugu Kommuneqarfik Sermersuumut suliareqqitassanngorlugit nassiunnagillu A-p B-llu panimmik angertartinneqarnissaannik sulianik suliarinninnerminik angajoqqaat aappariit illoqarfimmut Y-mut nuussimanerat tunngavilersuutigalugu unitsitsisimanera tamanna tunngavigalugu isorisarialittut isigaara.

6. Eqikkaalluni inerniliineq

Uanga paasinninnera unaavoq kommunip suliamik suliarinninnera ataatsimut isigalugu akuerineqarsinnaanngilluinnartuusimasoq. Kommuni sulianik suliarinninnermini amerlasoorpassuarnik, annertoorujussuarnik ilungersunartunillu kukkussuteqarsimavoq.

Tamatumani uanga paasinninnera unaavoq D-p kinguaassiuutitigut killissanik qaangiivigineqarsimasinnaanerani pasitsaassineq pillugu suliap misissorneqarnera unitsinniarlugu politiit aalajangerannik kommunip 13. december 2018-imi ilisimasaqalernerata kingornatigut A-p B-llu meerai angerlarsimaffimmik avataani inissisimaneqaannassanersut imaluunniit angerlartinneqarsinnaanersut kommunip isummerfigisimasariaqaraluaraa.

Uanga paasinninnera aammattaaq unaavoq kommunip A-p B-llu meeraasa inissinneqarnissaannik aalajangiineri 25. oktober 2018-imeersoq, 6. december 2018-imeersoq aamma 12. juli 2019-imeersoq amigarluinnartumik tunngavilersorneqarsimasut, kommunilu inissiinissaq pillugu aalajangiinermi 6. december 2018-imeersumi aamma angerlartitsiniarnerup itigartitsissutigineqarnissaannik aalajangiinermi 18. juli 2020-meersumi kiisalu inissiinissaq pillugu aalajangiinermi 12. juli 2019-imeersumi naammagittaalliornissamut periarfissaq pillugu ilitsersuisimasoq aalajangiinermik tiguisumit kukkusumik paasineqarsinnaasumik.

Kiisalu uanga paasinninnera unaavoq kommuni Naammagittaalliuuteqartarfiup aalajangiinikkut 23. januar 2019-imeersukkut suliamik suliareqqitassanngortitsilluni kommunimut utertitsinerata kingornatigut inissiinissaq pillugu aalajangiiniaasaarpallaarsimasoq.

Uanga paasinninnera tamatuma saniatigut unaavoq inissiinissaq pillugu kommunip aalajangigai 6. december 2018-imeersoq aammalu 12. juli 2019-imeersoq A-mut B-mullu angajoqqaatut oqartussaassuseqartunut nalunaarutigineqartussaasimasut.

Uanga paasinninnera aamma unaavoq angerlartitsinissamik qinnutigisaaq allakkatigut tunniunneqassasoq kommunip piumasaqaatigisinnaanngikkaa, kommunilu A-p B-llu meeqqamik angerlartinneqarnissaannik kissaateqarnerminnik oqaasiinnartigut saqqummiussineri tunngavigalugit iliuseqarsimasariaqaraluartoq.

Tamatumunnga atatillugu naliliinera unaavoq A-p B-llu meeqqamik angerlartin-
neqarnissaannik kissaateqarnerminnik oqaasiinnartigut saqqummiussineri tun-
ngavigalugit kommunip iliuuseqannginnerata piffissaq angajoqqaat aapparit
angerlartitsinissamik qinnuteqaataannik suliarinninnermut atorneqartoq sivilual-
laarujussuaq nassatarisimagaa.

Kiisalu uanga paasinninnera unaavoq suliani allagaatit tamatumunnga peqatigi-
tillugu Kommuneqarfik Sermersuumut nassiunnagit kommuni A-p B-llu meeraan-
nik angerlartitsiniarneq pillugu sulianik suliarinninnerminik angajoqqaat aapparit
illoqarfimmut Y-mut nuussimanagerat tungavilersuutigalugu unitsitsinermigut
tamatumalu kingornatigut suliami annertunerusumik iliuuseqaaqqinnginnermigut
ilungersunartunik kukkussuteqarsimasoq.

SULIAP INGERLASIMANERATA ALLAASERINEQARNERA

[Suliap ingerlasimaneranik allaaserisaqqaap ilai ataasiakkaat oqaaseqaatima oqaaseqammi pineqartut kukkuussusii ilisarnaruunnarsilugit sularineqarnerani ilanngunneqanngillat. Oqaasertat ilanngunneqannginnerat nalunaarneqartarpoq.]

Avannaata Kommunia (matuma kingornatigut kommunimik taaneqartartussaq) A-p B-llu meeraasa angerlarsimaffiup avataanut nukinginnartumik inissinneqar-nissaat pillugu 25. oktober 2018-imi imatut aalajangiivoq:

“Pillugu: Meeqqassi angerlarsimaffiup avataanut inissinneqarnerat:

Avannaata Kommunia [illoqarfik X] Inunnik Isumaginninnermi Allaffimmit matumuuna allakkatigut ilisimatitsissut ingerlanneqarpoq.

Ulloq 18. oktober 2018 Politiiniit allakkanik tigusaqarpugut, nalunaarutininik imaqartu-nik nalunaarutiginnittoqarsimasoq, panissi [D] pillugu kinguaassiuutitigut qaangiiffigi-neqarsimaneranik pasitsaassinermik imaqartunik.

Allakkatigut tiguneqartut toqqammavigalugit isumaginnittoqarfimmiit tusarniaaneq pisimavoq.

Meeqqat inuusuttuaqqallu tapersorsorneqarnissaannut Inatsisartut inatsisaat nr. 20, 26. juni 2017-imeersoq § 6 stk 1+2, § 7 stk 2, § 25 stk. 3-4, § 28, 2) & stk. 4, § 44 stk. 2.

Angerlarsimaffiup avataanut iniissiigasuarinissaq aalajangiunneqarsimavoq.

Isumaginnittoqarfiup aalajangigaanut isumaqataangikkuit ukua allakkat tighuneriniit sapaatit akunneri arfinillit qaangiutsinnagit naammagittaalliuuteqarsinnaavusi.

Naammagittaalliorfissaq akkiunneqarpoq.”

D-p politiini video atorlugu apersuinermi 4. december 2018-imi nassuiaatit oqaatigaa kinguaassiuutitigut atornerlunneqarsimanani. Tamanna illoqarfimmi X-

imi Isumaginninnermik Ingerlatsivimmi sulisup sulisuma ilaannik oqarasuaatik-
kut 21. februar 2020-mi oqaloqateqarnermini paasissutissiissutigaa.

A-p B-llu meeraat angerlarsimaffiup avataanut inissineqassasut kommuni 6. de-
cember 2018-imi aalajangeeqqippoq, imaattunik oqaasertaqartumik:

“Matumuuna nalunaarutigineqassaaq Avannaata Kommuniani Ilaqutareeqarnermut
Ataatsimiititaliap ulloq 05. december 2018 ataatsimiinnermini aalajangermat meeqqat
[E], [F], [D] aamma [C] angerlarsimaffiup avataanut inissineqassasut.

Inatsit una toqqammavigalugu aalajangiisoqarpoq: Meeqqat tapersorsorneqarnissaan-
nut Inatsisartut inatsisaat nr. 20, 26. juni 2017-imeersoq, § 28, imm. 2.

Maalaaruteqarnissamut ilitersuut:

Aalajangerneq una maalaaruteqartarfimmut Siunnersuisoqatigiinnut Ataatsimiititalia-
nullu Aqutsisoqarfik, Isumaginninnermut Maalaaruteqartarfik, [...], maalaarutigine-
qarsinnaavoq, aaliangiinnermiit sapaatit akunneri arfinillit qaangiutsinnagit. [...]”

Suliami allagaatinit erserpoq politiit D-p kinguaassiuutitigut killissanik qaangiiffi-
gineqarsimasinnaaneranik pasitsaassineq pillugu suliamik misissuinertik unitsik-
kitsik B-mut 7. december 2018-imi nalunaarutigisimagaat.

Suliami allagaatinit aammattaaq erserpoq meeqqat angerlarsimaffimmik avataa-
nut inissineqarnissaat A-p B-llu 14. december 2018-imi akuerisimagaat.

Suliami allagaatinit tamakkua saniatigut erserpoq kommunip meeqqat angerlar-
simaffiup avataanut inissineqarnissaannik aalajangiinera 6. december 2018-i-
meersoq A aamma B Isumaginninnermi Naammagittaalliuuteqartarfimmut (ma-
tuma kingornatigut Naammagittaalliuuteqartarfimmik taaneqartartussamut) 27.
december 2018-imi naammagittaalliuutigisimagaat. Makku angajoqqaat aappariit
naammagittaaliuutaannit erserput:

“Aalajangiussaq suna naammagittaalliuutigaaajuk?

Meeqqat angerlarsimaffimmit ullormit ullormut inissineqarnerat uagullu angajoqqaat
meeqqanut attaveqaqqusaannginnerput.

Kommuni suna naammagittaalliuutigaaajuk?

[Illoqarfimmi X-imi] isumaginnittoqarfik

Naammagittaalliornermut peqqut

Meeqqat uatsinnit peersinneqarnerat. Meeqqat illoqarfimmut allamut 15-12-2018 ingerlaannaq aallartinneqarput, pinngitsaaliillunilu peersitsinermit tunngavilersuutitut oqaasiinnartigut oqaatigineqarpoq imerpallaaqigattagoq, taamaattoqanngitsoq."

Naammagittaalliuuteqartarfik inissiineq pillugu suliaq suliareqqitassanngorlugu kommunimut utertinneqassasoq 23. januar 2019-imi aalajangiivoq. Makku Naammagittaalliuuteqartarfiup aalajangiineranit erserput:

"Suliaq nutaamik suliareqqitassanngorlugu Isumaginninnermi Naammagittaalliuuteqartarfimmit utertinneqarpoq.

Kommuni piumasaqaatinut naapertuuttumik, sulianik suliarinnittarneq pillugu inatsit malillugu nutaamik aalajangeeqquneqarpoq, taakkununga ilaallutik tunngavilersuineq naammagittaalliornermullu ilitsersuut il.il. pillugit malittarisassat. Pissutsit piviusut sorliit kommunip aalajangiinerminut tunngavigisimanerai aammalu inatsimmi aalajangersakkat oqaatigineqarnissaat aalajangiinnermi ilisimatitsissutigineqassapput. Qinnuteqarnerup nalaani pissutsit aallaavigalugit aalajangiisoqassaaq.

Tamatumunnga kommunip 2018-imi decemberip ulluisa arfernanni aalajangiinera amigartorujussuusoq aamma aalajangiinnermi pissutsit sorliit kommunimit tunngavilersuutigineqarsimanersut paasissutissiissutigisimanngikkai tunngavilersuutigaasi. Tamatumma saniatigut meeqqat tapersersorneqarnissaat pillugu Inatsisartut inatsisaat nr. 20, 26. juni 2017-imeersumi aalajangersakkat suut malillugit kommuni aalajangiisimangersoq kommunimit oqaatigineqarsimanngilaq.

[...]

Kommuni angajoqqaanut tamarmiusunut aalajangiissasoq Isumaginninnermi Naammagittaalliuuteqartarfimmit kommunimut eqqumaffigeqquneqassaaq, tassami angajoqqaajusut tamarmik inuit nalunaarsorsimaffiat naapertorlugu angajoqqaatut oqartussaassuseqarmata.

Qitornassi angerlarsimaffiup avataanut inissinneqarnissaat pillugu akuersinissi utertinnissaa kissaatigigussiuk taava tamanna kommunimut nalunaarutigissagissi Isumaginninnermi Naammagittaalliuuteqartarfimmit paasitinneqassaasi. Tamatuma kingorna qitornasi angerlartinneqassanersut imaluunniit akuersitinnasi inissiisoqassanersoq kommunimi suliarineqassaaq. Taamaattorli ilissi akuersiteqqaarasi kommunip qitornasi angerlarsimaffiup avataanut maannakkut inississimappagit tamanna aatsaat atuutissaaq.”

Kommuni A-p B-llu meeraat angajoqqaat aappariit akuersitinnagit angerlarsimaffiup avataanut inissinneqassasut kommuni 12. juli 2019-imi nutaamik aalajangiivoq. D-p inissinneqarnissaa pillugu aalajangiinermi makku erserput (E-p aamma F-ip inissinneqarnissaat pillugit taassuma pissuseqataanik aalajangiisqarsimavoq):

“Meeqqanik angerlarsimaffiup avataanut inissiinermut tunngatillugu

Matumuuna nalunaarutigineqassaaq Avannaata Kommuniani ilaqutareeqarnermut ataatsimiititaliap ulloq 14. juni 2019 ataatsimiinnermini aalajangerpaa [D] angerlarsimaffiup avataanut [nukinginnartumik] inissinneqassasoq.

Uku allakkat tigoriarukkit isumaginninnermut ilaqutareeqarnermullu immikkoortortaqarfimmut sullissisornut saaffiginnissaatit, suliap ingerlariaqqinnissaanut paasisutisani taamatullu sullissinerup qanoq ingerlanneqarnissaanut pilersaarusiornermut peqataaqullutit.

Inatsit toqqammavigineqartoq: Meeqqat inuusuttuaqqallu tapersorsorneqarnissaanut Inatsisartut inatsisaat 20, 26. juni 2017-imeersoq § 28 stk. 2 toqqammavigalugu.

Maalaaruteqarnissamut ilitsersuut:

Aalajangerneq una maalaaruteqartarfimmut Siunnersuisoqatigiinnut Ataatsimiititalianullu Aqutsisoqarfik, Isumaginninnermut Maalaaruteqartarfik [...] maalaarutigineqarsinnaavoq, aaliangiinermi sapaatit akunneri arfinillit qaangiutsinnagit. Allakkamut tapiliullugu nassiunneqarpoq maalaaruteqarnissamut immersugassaaq.”

A-p B-llu naammagittaalliuutaat 3. februar 2020-mi tiguara. A-p B-llu uannut naammagittaalliumminni ilaatigut makku paasisutissiissutigaat:

“Ulloq 25. okt. 2018 ualisoq meeqqat tamaasa kammalaataalu ilaat pulaarteq angerlarsimaarluta suna suna eqqasuut toqqissisimasuungattami ilaqutariinnguatut. Matu kasuttorpallammat nuliama ammaakkiartoramigit tupannangaqisumillu iserlutik politiit marluk inunnillu isumaginnittoqarfimmeersut aamma marluk. Nassuiaappaatingut ataataasoq, tassa uanga, panimminik angajullermik kinguaassiuutitingut atornerluisimammat meeqqat anisariaqartut.

[...]

Politiit immikkut ilisimasallit misissuereernerminni kommuni ilisimatipaat uangullu, naalisarlungu tamanna tunngavissaqanngitsoq pissutissaqanngitsorlu. Tamanna paasissutissiissutigineqareermat inunnik isumaginnittoqarfiup naqissuserpaatingut imera-juttuungatta paningut angerlarsimaffiup avataaniissasut. Taamatut toqqissisimasumik perorsaaniaraluarluni nakkarnaqaaq. 07-12-18 aggersangaavungut angerlartitsiniarnermi ingerlammat. [...]. Tusarluarnissarput qilanaaralugu nuannaarluta orniguppungut. Iseratta qanoruku oqaleriallartut, maani inissaqanngimmata aqangu [illoqarfimmut Y-mut] aallalerput. [Oqaasertat peerneqarput]

[...]

Siorna juullisioriarpugut maanga, 30-12-19 angerlartussaangaluaratta [illoqarfimmut X-imut] manna tikillungu suli maaniippugut, ini attartungarput ullormut 795-eqarpoq, paninnguagut meerannguagut ataatsimuulaartarnerat tamatta naammangalugit.

[...]”

Sulisuma ilaata kommunimi sulisoq oqarasuaatikkut 21. februar 2020-mi attaveqarfigaa, taassumalu ilaatigut makku paasissutissiissutigai:

- Kinguaassiuutitigut killissanik qaangiisoqarsimaneranik politiinut nalunaarutiginninneq kommunip 26. oktober 2018-imi [eqqortoq unaavoq 25. oktober 2018-imi] tigusimagaa. Siulittaasoq niviarsiaqqat pinngitsaaliilluni nukinginnartumik angerlarsimaffiup avataanut inissinneqarnissaannik ulloq taanna aalajangiimavoq, politiinut nalunaarutiginninneq aamma kinguaassiuutitigut

killissanik qaangiiffigineqarsimasinnaanerannik pasitsaassineq tunngavigalugit.

- Niviarsiaqqat 26. oktober 2018-imi [eqqortoq unaavoq 25. oktober 2018-imi] pinngitsaalliissummik angerlarsimaffiup avataanut inissinneqarput.
- Kingusinnerusukkut paasinarsivoq D-p kinguaassiuutitigut killissanik qaangiiffigineqarnera pineqanngitsoq, tamanna D-p politiini video atorlugu 4. december 2018-imi apersuinermi nassuiaatigalugu oqaatigisimavaa.
- Kommuni isumaqarsimasoq angerlarsimaffimmi allatigut (imigassamik) atornerluisoqartoq, meeqqat sumiginnarneqartut taamaattumillu pinngitsaalliissummik angerlarsimaffiup avataanut inissiineq kommunip atuutsiinnarsimagaa.
- Meeqqat angerlartinneqarnissaat A-p B-llu qinnuteqaatigisimangikkaat, meeqqatilli angerlaaterusullugit angajoqqaat aappariit arlaleriarlutik oqaatigisarsimagaat.
- Meeqqat angerlaassinnaangikkaat kommunip A-mut B-mullu paasissutissiisutigisimagaa, angajoqqaanummi aappariinnut taakkua malitassaannik iliiusissanut pilersaaruteqarmat, angerlarsimaffimmilu pissutsit pitsanngoriaateqarsimangimmata.
- A aamma B illoqarfimmut Y-mut juullimi tikeraarnissaminnut akiliunneqarsimasut, panitik najorsinnaaniassamatigut – angajoqqaallu illoqarfimmi X-imii-ginnarnissartik namminneq toqqarsimagaat.

A aamma B uannut 4. marts 2020-mi ilaatigut imatut allapput:

“Dec. 22-nili maanga [illoqarfimmut Y-mut] pivungut sullinneqarnerpullu naammaginangilluinnarpoq. Sap. akunnera kingulleq paasiniaavungut angerlartitsiniaaneq qanoq ingerlanersoq. Akineqarpungut angerlartitsiniaanermut tunngasoq qinnutingeqqaartariaqassangipput. Ukiut aappassaannut ingerlavoq qinnutingigatsinguli, nukilla-laajummernaqaaq allangaqartarningut tamarmik takuneqarsinnaasimangillat.”

A-p B-llu naammagittaalliuutaat 3., 14. aamma 17. februar 2020-meersut Avannaata Kommunianut allakkatigut 4. marts 2020-meersutigut ilanngussartalitsigut ingerlateqqillugit nassiuppakka, kommunimut suliarisassanngortillugit akisassanngortillugillu, naammagittaalliuutimmi angajoqqaat aappariit meeqqamik anger-

lartinneqarnissaannik qinnutigisaattut ilaatigut isigigakkit. Kommuni tamatumun-
nga atatillugu qinnuigaara aalajangiinermi assilinera uannut nassiuteqqullugu.

Kommuni allakkanni 4. marts 2020-meersuni qinnuigaara allagaatit uku uannut
nassiuteqqullugit:

“[...]

- Akuersinermut uppersaatip 14. december 2018-imeersup angajoqqaat atsiorsi-
masaata assilinera.
- Avannaata Kommuniata meeqqat pinngitsaaliissummik peersinneqarnissaannik 26.
oktober 2018-imi aamma 14. juni 2019-imi aalajangiinerisa assilineri.
- Isumaginninnermi Naammagittaalliuuteqartarfiup 2019-imi upernaakkut aalajangi-
nerata assilinera.

[...]

Allagaatit qulaani taaneqartut Avannaata Kommuniata piginnippagit, isumaqarpallu
oqaasiinnartigut aalajangiisoqarsimasoq, kommuni qinnuigaara allakkiat oqaasiinnar-
tigulluunniit aalajangiinerit pillugit allakkiat nalunaarsuiffimmiluunniit allattukkat uan-
nut nassiuteqqullugit.

[...]”

A aamma B kommunimut ulloq taanna allakkannik allakkatigut 4. marts 2020-
meersutigut ilisimatippakka.

Allakkakka 4. marts 2020-meersut kommunimut allakkatigut 28. april 2020-
meersutigut eqqaasitsissutigaaakka, matumani suliame allagaatit erseqqinnerusu-
mik taaneqartut nassiunneqarnissaannik qinnutigisara ilanngullugu eqqarsaati-
galugu.

Allakkakka 4. marts 2020-meersut kommunimut allakkatigut 29. maj 2020-
meersutigut eqqaasitsissutigeqqippakka, matumani suliame allagaatit erseqqin-

nerusumik taaneqartut nassiunneqarnissaannik qinnutigisara ilanngullugu eqqarsaatigalugu.

Allakkakka 4. marts 2020-meersut kommunimut allakkatigut 19. juni 2020-meersutigut eqqaasitsissutigaa, matumani suliami allagaatit erseqqinnerusumik taaneqartut nassiunneqarnissaannik qinnutigisara ilanngullugu eqqarsaatigalugu.

A-p B-llu paniisa angerlartinniarneqarnerat itigartillugu kommuni 18. juli 2020-mi aalajangiivoq.

A-p B-llu paniata D-p angerlartinniarneqarnera pillugu aalajangiinnermit 18. juli 2020-meersumit makku erserput. A-p B-llu paniisa E-p aamma F-ip angerlartinniarneqarnerannik itigartitsisoqarnissaannik tamatuma pissuseqataanik aalajangiisoqarsimavoq:

“[...]

Qinnuteqaat:

17. juli [A]-p [B]-llu meeqqamik qulaani pineqartup angerlartinneqarnissaanut meeqqat tapersorneqarnissaannut Inatsisartut inatsisaat nr. 20, 26. juni 2017 § 41 qinnuteqarput.

Suliap ingerlanera:

[...]

Aaliangiineq:

Matumuuna ilaqutareeqarnermut ingerlatsivik, Avannaata Kommuniata qinnuteqaat misissoreernerani aaliangerneqarpoq [D]-p angerlateqqinnissaanut qinnuteqaat itigartitsissutigalugu. Angajoqqaajusut massakut suli [illoqarfimmi X-imi] adresseqarput, oqaloqatingineqarneranni telefonikkut paasineqarpoq illortik maani [illoqarfimmi X-imi] tunisimallugu, [illoqarfimmilu Y-mi] attartungaqarlutik. Tunngavilersuutingineqarporlu aaliangiinnermut tunngavinnut ilaassasoq pissutingalungu naluneqarmat ilumut sivirusumik iningissallungu taanna angerlarsimaffingisartik massakut. Tassani piumasaqaateqarsimavoq [...] aamma Avannaata Kommunian angajoqqaat atuutsitsi-

sariaqartut, isumaqatingiissutinik angerlartitsiniaaneq iluatsittumik ingerlassappat.
[Oqaasertat peerneqarput]

Inatsit tunngavilersuutigineqartoq:

Meeqqat tapersorsorneqarnissaannut Inatsisartut inatsisaat nr. 20, 26. juni 2017 § 41, angerlarsimaffiup avataani inissiinerup atorunnaarsinneqarnissaa pillugu aaliangineq.

Maalaarsinnaatitaaneq:

Pisinnaatitaaffeqarput aaliangiussaq malaaruti[gi]ssallugu, inatsisit malillugit meeqqat tapersorsorneqarnissaannut Inatsisartut inatsisaat nr. 20, 26. juni 2017 § 60.

“Kommunalbestyrelsen Inatsisartut inatsisaat una malillugu aalajangigai, Isumaginermi Naammagittaalliortarfimmumut naammagittaalliuutigineqarsinnaapput Isumaginnittoqarfiup aqunneqarnera aqqissuunneqarneralu pillugit Inatsisartut peqqusutaanni aalajangersakkat malillugit.

Imm. 2. Inatsisartut inatsisaat una malillugu aalajangersakkat naapertorlugit aalajangiinernut, meeqqat suliani imminnut tunngasuni, tak. imm. 1, naammagittaalliorsinnaatitaapput.

Imm. 3. Meeqqap naammagittaalliorsinnaatitaanera pillugu maleruagassanik erseqqinnerusunik Naalakkersuisut aalajangersaasinnaapput.”

Erseqqissarneqarpoq maalaarsinnaatitaaneq sapaatit akunneri 6 aaliangiinermi allagartaq tigueneraniik periarfissaqarmat maalaarnissamut.

Attavissaq:

Atuisoqarnermut Unammilleqatigiinnermullu Aqutsisoqarfik

Imaneq 29, 1. sal

3900 Nuuk

Oqarasuaat 32 80 33

Mail: aua@nanoq.gl

[...]”

Suliami allagaatit kommunimit allakkatigut 20. juli 2020-meersutigut tiguakka, kommunimut allakkannut kingullernut 19. juni 2020-meersunut akissutitut.

A Ombudsmandeqarfimmumut 23. juli 2020-mi orniguppoq, sulisumalu ilaannut ilaatigut oqaatigalugu kommunip suliamik suliarinninnera amigartooq, tassami

kommunip paasissutissat tamaasa piginngimmagit. A-p aammattaaq oqaatigaa meeqqamik angajulliit marluk angerlartinneqarnissartik kissaatigigaat, panitsillu angajulleq ernertillu kommunip illoqarfimmi X-imi ingerlatsivianut saaffiginnessimasut oqaatigalugulu angajoqqaatik imigassartorunnaarsimasut.

Isumaginninnermi Naammagittaalliuuteqartarfik 24. juli 2020-mi qinnuigaara aalajangiinnermi 23. januar 2019-imeersup (qallunaatuata) assilinera uannut nassiateqqullugu.

Naammagittaalliuuteqartarfiup aalajangiinerata 23. januar 2019-imeersup (qallunaatuata) assilinera 7. august 2020-mi tiguara.

Naammagittaalliuuteqartarfik 17. august 2020-mi qinnuigaara suliami allagaatit amerlanerusut nassiateqqullugit, taakkulu 1. september 2020-mi tiguakka.

Kommuni allakkatigut 9. september 2020-meersutigut qinnuigaara suliami allagaatit erseqqinnerusumik taaneqartut suliarlu pillugu oqaaseqaat uannut nassiateqqullugit, matumani apeqqtutinut ukununnga akissutit ilanngullugit eqqarsaatigalugit:

“Inissiineq pillugu apeqqtikka

1. Kommuni qinnuigaara [D]-p, [F]-ip aamma [E]-p akuersisitsinani inissikkasuarneqarnissaannik kommunip 25. oktober 2018-imi aalajangiinera [A]-mut [B]-mullu nalunaarutigineqarsimanersoq paasissutissiissutigeqqullugu.

Aalajangiineq 25. oktober 2018-imeersoq kommunip angajoqqaanut nalunaarutigisimappagu kommuni qinnuigaara aalajangiineq angajoqqaanut qanga nalunaarutigineqarsimanersoq kiisalu kommunip aalajangiinera oqaasiinnartigut allakkatigulluunniit angajoqqaanut nalunaarutigineqarsimanersoq paasissutissiissutigeqqullugu.

Aalajangiineq kommunip oqaasiinnartigut nalunaarutigisimappagu kommuni qinnuigaara tamanna pillugu allakkiami (notat) assilinera uannut nassiateqqullugu. Aalajangiineq allakkatigut nalunaarutigineqarsimappat kommuni qinnuigaara aalajangiinerup assilinera uannut nassiateqqullugu.

Meeqqanik tapersersuisarneq pillugu inatsimmi § 29, imm. 1 imaattunik oqaasertaqartoq innersuussutigaa:

“§ 28 malillugu kommunalbestyrelsen anglerlarsimaffiup avataanut akuersisitseqqaarnani inissiinermik akuersissuteqarneq angajoqqaatut oqartussaassusilimmut imaluunniit meeqqamik isumaginnittuusumut sapinngisamik akunnerit 24-t qaangiutsinnagit nalunaarutigisimassavaa. Nalunaarut inissiinermik aalajangiisoqarnerata sumik tunngaveqarneranik imaqassaaq kiisalu naammagittaalliorsinnaanermut ilitsersuut.”

2. Kommunip aalajangiinera 6. december 2018-imeersoq tunngavilersuummik imaqanngilaq. Taamaalilluni pingaarnertut isiginiagassat kommunip missingiussinerani aalajangiisuusut pissusiviusullu kommunip aalajangiinermini pingaartillugit isiginiarsimasani kommunip aalajangiinermini nassuiarsimangilai, taamatuttaarlu inatsimmi malit-tarisassat aalajangiinermini tunngavigineqartut kommunip innersuussutigisimanagit.

a. Kommuni qinnuigaara [D]-p, [F]-ip [E]-llu anglerlarsimaffimmik avataanut inissinneqarnissaannik kommunip 6. december 2018-imi aalajangiinera angajoqqaat akuersitillugit akuersitinnagilluunniit pisimanersoq paasissutissiissutigeqqullugu.

Kommunip niviarsiaqqat taakkua anglerlarsimaffimmik avataanut inissinneqarnissaannik aalajangiinera 6. december 2018-imeersoq angajoqqaat akuersitillugit pisimappat kommuni qinnuigaara akuersinermut uppersaatip atsiorneqarsimasup assilinera uannut nassuteqqullugu.

b. Kommuni qinnuigaara [D]-p, [F]-ip aamma [E]-p anglerlarsimaffimmik avataanut inissinneqarnissaannik kommunip 6. december 2018-imi aalajangiineranut tunngaviusoq paasissutissiissutigeqqullugu.

c. Kommunip aalajangiinera 6. december 2018-imeersoq taamaallaat [A]-mut ingerlataavoq. Kommuni qinnuigaara aalajangiineq [A]-mut aamma [B]-mut tamarmik angajoqqaatut oqartussaassusermik tigummiqartuusunut sooq ingerlatinneqarsimanginnersoq nassuiaqqullugu.

3. Paasissutissat pigineqartut tunngavigalugit uanga suliamik paasinninnera unaavoq kommuni niviarsiaqqat anglerlarsimaffimmik avataanut inissinneqarnissaannik 6. de-

cember 2018-imi aalajangiisimasoq, angajoqqaat akuersitinnagit, angajoqqaallu ni-
viarsiaqqanik inissiineq aatsaat 14. december 2018-imi akuerisimagaat.

Taamaattoqarpat kommuni qinnuigaara angajoqqaat akuersillutik uppersaataat 14.
december 2018-imeersoq tunngavigalugu niarsiaqqat angerlarsimaffimmik avataa-
nut inissineqarnissaannik kommuni nutaamik sooq aalajangiisimanningsooq paa-
sissutissiissutigeqqullugu.

4. Suliaq kommunip suliareqqissagaa nutaamillu aalajangiissasoq Naammagittaalliu-
teqartarfik 23. januar 2019-imi aalajangiivoq. [D], [F] aamma [E] akuersisitsinani "i-
nissikkasuarneqassasut" kommuni 14. juni 2019-imi aalajangiivoq.

a. Kommuni qinnuigaara kommuni niarsiaqqat inissineqarnissaannik Naammagit-
taalliuuteqartarfiup suliamik suliareqqitassangortitsinerata kingornatigut sooq aat-
saat 14. juni 2019-imi, tassalu qaammatit tallimangajaat qaangiunneranni aalajangi-
siannersooq paasissutissiissutigeqqullugu.

b. Kommuni qinnuigaara [D]-p, [F]-ip aamma [E]-p akuersisitsinani "inissikkasuarne-
qarnissaannik" kommunip aalajangiinera 14. juni 2019-imeersoq piffissami kommunip
aalajangiinerata nalaani [A]-mut [B]-mullu oqaasiinnartigut nalunaarutigineqarsima-
nersooq imaluunniit aalajangiineq angajoqqaanut allakkatigut 12. juli 2019-imeersu-
tigut aatsaat nalunaarutigisimanageraa paasissutissiissutigeqqullugu. Kommunip aalaja-
ngiineq angajoqqaanut oqaasiinnartigut nalunaarutigisimappagu kommuni qinnuigaa-
ra kommunip tamanna pillugu allakkiaata (notat) assilinera uannut nassuteqqullugu.

Meeqqanik tapersuisarneq pillugu inatsimmi § 29, imm. 1 qulaani issuarneqartooq
innersuussutigaa.

c. Kommunip aalajangiinera 14. juni 2019-imeersoq tunngavilersuummik taamatut-
taaqaq imaqqanngilaq. Taamaalilluni pingaarnertut isiginiagassat kommunip missingius-
sinerani aalajangiisuusut pissusiviusullu kommunip aalajangiinermi pingaartillugit
isiginiarsimasani kommunip aalajangiinermi nassuiarsimannngilai, taamatuttaarlu inat-
simmi malittarisassat aalajangiinermi tunngavigineqartut kommunip innersuussutigi-
simanagit.

Kommuni qinnuigaara [D], [F] aamma [E] piffissami tassani 25. oktober 2018-imili akuersisitsinani inissinneqareersimagaluartut kommuni taakkua "inissikkasuarneqarnissaannik" 14. juni 2019-imi sooq aalajangiisimanersoq paasissutissiissutigeqqullugu.

d. Kommunip aalajangiinera 14. juni 2019-imeersoq taamaallaat [A]-mut ingerlatitaa-voq. Kommuni qinnuigaara aalajangiineq [A]-mut aamma [B]-mut tamarmik angajoqqaatut oqartussaassusermik tigummiagartuusunut sooq ingerlatinneqarsimannginner-
soq nassuiaqqullugu.

Angerlartitsiniarneq pillugu apeqquktikka

[A]-p [B]-llu naammagittaalliutaat kommunimut ingerlateqqillugit allakkatigut 4. marts 2020-mi nassiuppakka, suliarisassanngortillugit akisassanngortillugillu, kommunimullu oqaatigalugu naammagittaalliutit taakku meeqqat angerlartinneqarnissaannik qinnuteqaatit isigigikka.

[D]-p [F]-ip aamma [E]-p angerlartinneqarnissaannik qinnuteqaat itigartinneqassasoq kommuni 18. juli 2020-mi aalajangiivoq. Kommunip aalajangiineranit 18. juli 2020-meersumit erserpoq angerlartitsinissaq [A]-p [B]-llu 17. juli 2020-mi qinnuteqaatigisimagaat.

1. Kommuni qinnuigaara angerlartitsiuanerup itigartitsissutigineqarnissaannik sooq aatsaat 18. juli 2020-mi aalajangiisimanerluni paasissutissiissutigeqqullugu, tamanalu pisimalluni [A]-p [B]-llu naammagittaalliutaannik niviarsiaqqat angerlartinneqarnissaannik qinnuteqaatit uanga ingerlatitseqqillunga kommunimut nassiussinermak kingornatigut qaammatit pingasut affallu missaasa qaangiunneranni.

2. Kommuni qinnuigaara [D]-p, [F]-ip aamma [E]-p angerlartinneqarnissaannik qinnuteqaatit itigartinneqarnissaannik 18. juli 2020-mi aalajangiinnginnermini meeqqat angerlartinneqarnissaannut tunngavissaqarnersoq sukumiinerusumik misissuisimanerluni paasissutissiissutigeqqullugu, matumani meeqqanik oqaloqateqarsimaneq inissiviusullu allakkatigut oqaaseqaataanik pissarsiniarsimaneq ilanngullugit eqqarsaatigalugit.

Meeqqanik tapersuisarneq pillugu inatsimmi § 41, imm. 1 innersuussutigaa, taannalu imaattunik oqaasertaqarpoq:

“Angerlarsimaffiup avataani inissiinerup atorunnaarsinnissaa pillugu kommunalbestyrelsip aalajangiinissaa sioqqullugu kommunalbestyrelsip qulakkeersimassavai:
1) angajoqqaatut oqartussaassusillip, ilaatigut Inatsisartut inatsisaat manna malillugu, ikiuinissamik suliniuteqarfigineqarluni meeqqap pisariaqartitaanik naammasinnissinnaanera,
2) meeqqanik oqaloqatiginnittoqarsimanera, tak. § 43,
3) inissiiffiusumit allaganngorlugu oqaaseqaammik pissarsiniartoqarsimanera,
4) meeqqap angajoqqaallu angerlartitsinissamut piareersarluarsimanerat, aamma
5) § 46 naapertorlugu angerlartitsinissamut iliuusissanut pilersaarusiortoqarsimanera kiisalu meeqqap angajoqqaatullu oqartussaassusillip piffissami angerlartitsinerup siuninngua kingornalu meeqqap attaveqarfigisartagarisimasinnaasaasa ikiorserneqarnissaannik piareersaasoqarsimanissaa.”

Oqaaseqaatinni 2019-2-mi immikkoortoq 4.1, Inissiisarneq angerlartitsisarnerlu pillugit malittarisassat, aamma innersuussutigaara.

3. Inissiiviusup oqaaseqaataa kommunip niviarsiaqqat angerlartinneqarnissaannik angajoqqaat qinnuteqaataata suliarineqarneranut atatillugu pissarsiarisimappagu inissiiviusullu niviarsiaqqat inissiivimmiiginnarnissaat inassutigisimappagu kommuni qinuigaara Meeqqat Pillugit Paasisimasalittut Qitiusumik Ataatsimiititaliap allattoqarfia tamatuminnga ilisimatissimanerlugu paasissutissiissutigeqqullugu.

Meeqqanik tapersersuisarneq pillugu inatsimmi § 41, imm. 2 innersuussutigaara, tassangalu makku erserput:

“Kommunalbestyrelsip inissiinerup unitsinnissaanut tunngatillugu aalajangiinnginnermini akisussaaffigaa inissiffimmiit allaganngorlugu oqaaseqaammik pissarsiniartoqarsimanissaa, tak. imm. 1, nr. 3. Inissiiffiusup oqaaseqaammimi inassutigippagu meeqqap inissiffigisaminiiginnarnissaa kommunalbestyrelsip Meeqqat Pillugit Paasisimasalittut Qitiusumik Ataatsimiititaliap allattoqarfia ilisimatissavaa. Meeqqat Pillugit Paasisimasalittut Qitiusumik Ataatsimiititaliap allattoqarfiata aalajangersinnavaa suliassaq Meeqqat Pillugit Paasisimasalittut Qitiusumik Ataatsimiititaliamut oqaaseqarfigisassanngorlugu saqqummiunneqassanersoq, tak. § 53.”

[...]”

A-p kommuni oqarasuaatikkut 10. september 2020-mi attaveqarfigisimavaa, makkulu kommunip suliami allattuiffimmi allassimavai:

“[A] sianerpoq meeqqat aasarnissaannut aaqqeeqqusilluni, itigartinneqarpoq, pissutigalungu sullinneqassangunik inuttut namminneq aggettussaammata. Piumaffingeqqinneqarpoq [illoqarfimmi Y-miinginnarniarunik] adresse allanngortittariaqaraat sullisivimmuut nalunaarlutik. Piumannngilaq, oqarfingivara taava illoqarfimmi najugaqarniannngikkussi maanga utertariaqassasut. Billetimik noqqaavoq, kisianni nassuiaanneqarpoq utissutissaminnik peqarnikuullutik akiliutsinnikut, kisianni namminneq aaliangerlungu aallarnikuunatik [illoqarfimmit Y-minngaanniik], taava oqarfingineqarnikuusut namminneq isumangissangaat aallarnissartik.

[...]”

A kommunimut oqarasuaatikkut 1. oktober 2020-mi attaveqarfiginneqqissimavoq. Kommunip suliami allattuiffimmi saaffiginninneq pillugu makku allattorsimavai:

“Qulaani taaneqartup nulia attaveqarpoq mobilikkut, meeqqanillu peqatigiittarnissatik pillugit saaffiginninniarlutik, sagbehandlerinngooq unitsinnikummagu suna tamaat. Siullermitut angajoqqaat meeqqatillu peqatigiittalerusukkaluarlutik.

Anaanaasoq qulaani taaneqartup nulia nassuiaanneqarpoq telefonikkut sullinneqarsinnaangimmat [illoqarfimmilu X-imiinngimmat] [illoqarfimmi Y-mi] Sermersuup Kommunianut allagaqarluni ingerlatissagai, taakkulu [illoqarfimmi X-imi] adresseqarnerat tunngavigalugu [illoqarfimmut X-imut] ingerlatitseqqissasut.

Ilisimatitsivoq Sermersuumut saaffiginnissimagaluarlutik taakku oqarsimasut taamaaliorsinnaanatik. Taamaammatt [illoqarfimmut X-imut] sianerlutik.

Nassuiaanneqarpoq taamatut oqarsimanera [B]-p nulia saaffiginnissimannngitsut Sermersuup Kommunianut. Sermersuup Kommunia [illoqarfimmi X-imi] isumaginninnermut ilaqutareeqarnermullu immikkoortortaqarfimmit attavigineqarnikuuvoq, tassangaanniillu paasitinneqarpugut taamaattoqannngitsoq, saaffiginnissinnaasut namminnerlu Sermersuup Kommunia ingerlatsisinnaallutik nassuiaapput.

Taamaammat [B]-p nulia ilisimatinneqarpoq saaffiginnissutini allakkatigut ingerlatis-sagai Sermersuup Kommunianut tunniullugit [illoqarfimmut Y-mut] ingerlateqqullugit.

[...]"

A-p B-llu meeqqamik angerlartinniarneqarnerat pillugu suliap suliarineqarnerata kommunimit unitsinneqarsimanera pillugu naammagittaalliuutaat 1. oktober 2020-mi tiguara.

Kommunip allakkannut 9. september 2020-meersunut akissutitut ilaatigut makku allakkani 9. oktober 2020-meersuni paasissutissiissutigai:

"[...]

Aallaqqaasiutitut oqaaseqaatit:

Piffissami meeqqat 2018-imi oktoberimi kinguaassiuutitigut atornerluinermik pasit-saassineq pissutigalugu meeqqat angajoqqaaminnit arsaagaanerisa kingornatigut i-ngerlasumi isumaginninnikkut misissuineq iliuusissanullu pilersaarut suliarineqarput. Taaneqartoq kingulleq 2020-p aallartinnerani nutarterneqarpoq.

[...]

Kinguaassiuutitigut atornerluisoqarsimasinnaaneraniq pasitsaassisimasoqarunnaar-poq, kommunilli isumaginninnikkut misissuinerlut atillugu paasivaa imigassamik atornerluineq meeqqanillu isumassuisinnaassuseqarneq assut ajornarorsiutigineqar-tut. [...]

Pissutsit pitsaanerulersinniarneqarnissaat siunertaavoq, taamaalillutik meeqqat ta-manna pissutsit toqqissisimanartut atorlugit pisinnaappat angajoqqaaminnut angerlar-sinnaaqqullugit. [Oqaasertat peerneqarput]

Angajoqqaalli suleqatiginiarnerat ajornakusoortorujussuusimavoq, taakku ataatsi-miinnermut takkutinnitsoortarsimmata pisunilu allani aalakoortut takkuttarsi-mallutik.

Angajoqqaat 2019-ip naanerani [illoqarfimmut X-imut] nuuipput. Sumi najugaqarner-tik paasissutissiissutigiumanngilaat, tamannalu politiit suleqatigigaluarlugilluunnit qu-laajarneqarsinnaasimannngilaq.

[...]

[A]-p [B]-llu [illoqarfimmi X-imi] inigisartik tunisimavaat, Avannaatalu Kommuniata nalunngisai malillugit [illoqarfimmi X-imi] allamik inaateqaratik. Avannaata Kommu-niata paasinninnera unaavoq [A] aamma [B] taamaalillutik [illoqarfimmut Y-mut] nuuissimasut, suliamillu suliarinninneq Kommuneqarfik Sermersuumut nuunneqarta-riaqartoq. [A] aamma [B] inunnik nalunaarsuiffimmi najugaqarfimminnik allanngortit-simannikkaluarpataluunniit. Tamanna kommunip inatsisinik unioqqutitsinertut nali-lerpaa, tamatumali nuuttoqarsimanera allanngortinngilaa.

Ombudsmandip tamanna pillugu oqaaseqaatai Avannaata Kommuniata tusarusuppai.

Piffissami angajoqqaat [illoqarfimmi Y-mi] najugaqarfigisaanni misissuinernik annertu-nerusunik ingerlatsiniarneq malitseqartitsissutitullu ikorfartuiniarnerit kommunip assut ajornartorsiutigisimavai. Angajoqqaat sumiiffigisaminnik paasissutissiissutiginnikku-sunnginnerat tamatumunnga pissutaavoq.

Pisut ingerlasimanerat pissutsillu allaaserineqartut qulaani taaneqartut meeqqat anga-joqqaaminnut angerlartinniarneqarnerannik aallartitsinissap kommunimit illersorne-qarsinnaanngitsutut isigineqarneranut pissutaapput.

Nassuerutigineqarpoq suliamik suliarinninneq eqqarsaatigalugu ilumut pitsaanerpaasi-manngitsoq, angerlartitsinissamillu kissaateqarneq eqqarsaatigalugu inissiiviusoq pi-sortatigoornerusumik saaffigineqarsimasariaqaraluartoq, taamatuttaarlu meeqqanik periarfissaqarneralu naapertorlugu angajoqqaanik oqaloqatiginninnerit ingerlanneqar-simasariaqaraluartut.

Avannaatali Kommunia isumaqarpoq suliaq ilumut Kommuneqarfik Sermersuup ataa-niippat taakkua massakut aallartinneqarnissaat naleqqutinngitsoq.

Taamaattoqarnera Ombudsmandip isumaqatigippagu suliaq suliarisassanngortillugu Kommuneqarfik Sermersuumut piaartumik nassiunneqassaaq.

Ombudsmandip apeqqutai:

Inissiineq pillugu apeqqutit

Aalajangiineq 25. oktober 2018-imeersoq angajoqqaanut appariinnut oqaasiinnartigut nalunaarutigineqarpoq. Meeqqat isumaginnittoqarfimmit politiit ikiortigalugit aaneqarput. Allakkatigut tunngavilersuut ulloq taanna suliarineqarpoq, tassanilu oqaatigineqarluni siunertaasoq tassaasoq angajoqqaat meeqqaminnik sunniinarsinnaanerannik pinaveersimatitsiniarneq.

Allakkat meeqqat inissinneqarnerannut tunngavilersuuterpiaasumik imaqqangillat. Píneqartorli tassaavoq meeqqamik ([D]-mik) kinguaassiuutitigut atornerluisimasinnaanermik pasitsaassineq, tamannalu Kommunalbestyrelsimut paasissutissiissutigineqarpoq.

Allakkatigut aalajangiineq taamaallaat [A]-mut nassiunneqarpoq, angajoqqaanullu ta-manut nassiunneqarsimannginnera kukkuneruvoq.

Politiini suliaq pillugu aalajangiineq kommunip 13. december 2018-imi tiguaa. Taamani kommuni aalajangersimavoq meeqqat angerlarsimaffimmik avataanut inissinneqasasut, angerlarsimaffimmi imigassap ajornartorsiutaanerujussua meeqqallu isumasorneqannginnerat pissutigalugit.

Kommuni imigassamik atornerluinerup ingerlaqqinneranik takusinnaasat angajoqqaallu ingerlatsivimmi ataatsimiinnerni peqataanissamut piumassuseqannginnerat taamalu ikorfartuiniutinik ikiorserneqarumanginnerat aallaavigalugit nalilliivoq meeqqat angerlarsimaffimmik avataani inissisimaneqaannassasut. Angajoqqaat imigassamik atornerluinerannik innuttaasunit saaffiginnissutit (nalunaarutiginninnerit) aammattaaq tiguneqartarsimapput.

Angerlartitsiniarneq

Angerlartitsiniarneq itigartitsissutigineqarpoq, tassami angajoqqaat inigisaqanngimata, taamatuttaarlu imigassamik atornerluinerup ingerlaqqinnera suleqatiginninnissaminnullu piumassuseqannginneq malugineqarlutik.

Angajoqqaat aappariit angerlartitsinissamik kommunimut qinnuteqaateqarsimanngilat, tamannalu pillugu paasissutissat kommunip taamaallaat Ombudsmandimit pismallugit.

Inissiiviusup oqaaseqaataa angajoqqaat aapparit [illoqarfimmut Y-mut] nuunnerisa kingornatigut pissutsit paatsiveerusimanartut pissutigalugit pissarsiariniarneqarsimanngilaq. Angajoqqaammi sumi najugaqarnertik paasissutissiissutigiumanngimmassulluunniit.

[...]” (Ombudsmandeqarfimmi nutsigaavoq)

Uanga paasinninnera unaavoq allakkanni suliaq pillugu apeqqutikka pineqartut kommunip allakkani 9. oktober 2020-meersuni akisimanngikkai. Taamaattumik kommuni allakkatigut 29. oktober 2020-meersutigut qinnuigeqqippara allakkanni 9. september 2020-meersuni apeqqutikka tamaasa akeqqullugit.

Kommuni A-p B-llu uannut naammagittaalliuutaat 1. oktober 2020-meersoq tungavigalugu qinnuigaara makku uannut nassiateqqullugit:

“[...]

- Meeqqat angerlartinneqarnissaannik suliap suliarineqarneranik kommunip unitsitsinera pillugu kommunip [A]-mut [B]-mullu nalunaarutaata assilina.

[...]

Allagaatit qulaani taaneqartut kommunip piginnippagit, kommunili isumaqarpat aalajangiinerit oqaasiinnartigut nalunaarutigineqarsimasut, kommuni qinnuigaara aalajangiinerit oqaasiinnartigut nalunaarutigineqarsimasut taakku pillugit kommunimi allakiarineqarsimasut nalunaarsuiffinniluunniit allattukkat uannut nassiateqqullugit.

Allakkiaat nalunaarsuiffinniluunniit allattukkat kommunip aamma piginnippagit tamanna pillugu kommuni nassuaateqaqquara kommunip aalajangiineri isumalimmik isumerfigisinnaaniassagakkitt.”

Kommunip oqaaseqaataa imaattoq allakkannut 9. september 2020-meersunut akissutitut allakkatigut 29. november 2020-meersutigut tiguara:

“Apeqqutinut akissutit

1. Aalajangiineq 25. oktober 2018-imi angajoqqaajusunut nalunaarutigineqarpoq, politillu ikiortigalugit qatanngutigii Isumagininnermik ingerlatsivimmit aaneqarlutik, kiisalu aalajangiineq 25. oktober 2018 allakkatigut nalunaarutigineqarluni meeqqat angajoqqaaminnit sunnarniarneqannginnissaat tunngavilersuutigalugu.
2.
 - A. Nalunaarut 6. december 2018-imeersoq Ilaqutariinnermut Ataatsimiititaliamit aalajangiinnermik allagaapput. Allakkat 6. december 2018-imeersut 25. oktober 2018-imi siulittaasup aalajangerneranit (akissut nr. 1 takuuk) akissutaapput. Allakkat imminni meeqqat inissinneqarnerannut tunngavilersuummik imaqanngilat, inissiinissamilli kommunalbestyrelsimut qinnuteqaat tunngavilersuutit suut pineqarneranik imaqarluni. Taamaattumik aamma akuersissuteqarnermik nalunaarummik imaqanngilaq [D]-p kinguaassiuutitigut atornerlunneqarsimasinnaaneranik pasitsaassineq pissutigalugu.
 - B. Aalajangiinnermut tunngaviuvoq [B]-p (ataataasup) [D]-mik kinguaassiuutitigut atornerluisimasinnaanera pasitsaanneqarsimammat. Tamannalu tunngavigalugu 25. oktoberimi siulittaasup aalajangiinissaanut qinnuteqaateqartoqarpoq.
 - C. Aalajangiinerup [A]-mut nassiunneqarsimanera kommunalbestyrelsip kukkuneraraa. Angajoqqaajusunut tamanut nassiunneqartussaagaluarpoq.
3. [D]-p kinguaassiuutitigut atornerlunneqarsimasinnaaneranik suliaq 6. december 2018-imi politiit sulii suliaraat, taamaattumillu meeqqat pinngitsaaliissummik arsarrinnissutigineqarnissaannik 25. oktober 2018-imeersoq sulii atuulluni. Politiit sulii suliarinninnerannit aalajangiineq 13. december 2018-imi tiguneqarpoq, taamaalillunili angajoqqaajusut angerlarsimaffimmi imigassamik atornerluisuunerat tunngavigalugu meeqqat angerlarsimaffiup avataanut inissinneqarnissaat aalajangerneqarsimalluni.
Taamaalilluni angerlarsimaffiup avataanut inissiinissamut akuersissut 14. december 2018-imi angajoqqaajusunit atsiorneqarpoq.

4.

- A. Suliat qatanngutigiinnut [D]-mut, [F]-imut [E]-mullu tunngasut suliarinerini angajoqqaajusut suleqatikkuminaattarsimapput, tamannalu pissutigalugu suliaq sivisusimalluni. Angajoqqaat suliamik suliarinnittup ataatsimeeqatiginissaanut isumaqatigiissutigineqartunut takkutinnngitsoortarsimapput aalakoortulluunniit kommunimut takkuttarsimapput, taamatullu aamma angajoqqaatut oqartussaassusillit marluullutik ataatsimiinnissanut isumaqatigiissutigineqarsimasunut takkutinnngikkaangata [A] kisimiilluni malugisimaarluni imigassarsunnillunilu ataatsimiinnernut isumaqatigiissutigineqarsimasunut takkuttarluni.
- B. Suliassaqarfiit akimorlugit suleqatigiissitap ataatsimiinnerani aalajangerneqarsimavoq meeqqat pinngitsaaliissummik inissinneqassasut, oqaloqatigineqarnissanut takkunneq ajorneq aamma anaanaasup imigassarsunnissinnaasarnera, kii-salu angajoqqaajusut kommunimik suleqateqarusunnginnerat pissutigalugit. Meeqqat tapersersorneqarnissaannut Inatsisartut inatsisaanni nr. 20-mi, 26. juni 2017-imeersumi § 28, imm. 3.
- C. Suliap "inissikkasuaanissatut" ingerlasimanera Avannaata Kommunanit suliamik suliarinninnermi kukkuneruvoq. Tamanna kukkunerusoq nassuerutigisariaqarparput, meeqqammi 25. oktoberimiilli angerlarsimaffiup avataanut inissinneqarsimammata.
- Qatanngutigiit inissinneqarnerisa sivitsorneqarnissaanik qinnuteqaat angajoqqaajusunik oqaloqateqartarnernik, taamatullu aamma angajoqqaajusut imigassamik atornerluinerat pillugu innuttaasunit saaffiginnissutinik tunngaveqarpoq.
- D. Angajoqqaat marluullutik ataatsimut angajoqqaatuut oqartussaassuseqarmata [A]-ginnarmut ingerlatsisimaneq aamma Avannaata Kommunanit kukkunerusoq oqaatigineqartariaqarpoq.

Angerlartitsiniarneq

1. Meeqqat angerlartinneqarsinnaanissaannut angajoqqaajusut namminerisaminnik ineqanngimmata angerlartitsiumaneq itigartinneqarpoq. Angajoqqaajusut namminerisaminnik illorisartik tunisimavaat namminerminnullu inissamik nassaarsimantik, naak illutoqqaminni najugaqartutut suli nalunaarsorneqarsimagaluarlutik. Angajoqqaajusut kommunimut najugaqarfigisaminnut uterusunngillat, taamaattumillu suliaq oqarasuaatikkut suliarineqarsinnaanani, pineqartut 2019-imi decemberimili [illoqarfimmi Y-miimmata], taamalu suliamik suliarinninneq oqarasuaatikkut ingerlanneqarsinnaanani.
2. Angajoqqaajusut meeqqat pinngitsaaliissummik arsaarinnissutigineqarnerisa kingornatigut qaqugukkulluunniit allakkatigut angerlartitsinissamik qinnuteqarsiman-

ngillat, kommunili Ombudsmandimit (allakkanik) 4. marts 2020-mi tigusaqarsimaluni, tassani oqaatigineqarluni kommunip meeqqanik najuisarneq annikillismagaa angerlartitsinissarlu itigartissimallugu. Kisianni angajoqqaajusut [D]-mut, [F]-imut aamma [E]-mut tunngatillugu angerlartinneqarnissaannik Avannaata Kommunianut qinnuteqarsimanerannut allakkatigut takussutissaqanngilaq.

3. Inissiiviusoq oqaaseqaateqartinneqarsimanngilaq, angajoqqaajusut panimmik angerlartinneqarnissaannik allakkatigut Avannaata Kommunianut qinnuteqarsimanngimmata.

Najuisarneq

[...]” (Ombudsmandeqarfimmi nutsigaavoq)

Allakkakka 20. oktober 2020-meersut allakkatigut 1. december 2020-meersutigut ilanngussartalitsigut kommunimut eqqaasitsissutigaakka, matumani suliami allagaatinik erseqqinnerusumik taaneqartunik A-p B-llu uannut naammagittaalliutaat 1. oktober 2020-meersoq tunngavigalugu nassiusseqqusinera ilanngullugu eqqarsaatigalugu.

Kommunip suliami allattuiffiannit 4. december 2020-meersumit ilaatigut makku erserput:

“Innersuunnarpoq angajoqqaat [illoqarfimmi Y-miinnissartik] aaliangiusimappassuk piaartumik adresseqalernissaat [illoqarfimmi Y-mi]. Inuit allattorsimaffiani aamma inatsiseqarmat najukkami adresseqartussaallutik. Aammalu adresseqalerpata [illoqarfimmi Y-mi] qanimut sagsbehandlerimik suleqateqarsinnaalissallutik. Anaanaq paasinippoq piaartumillu adresseqalernissartik aanaasaartukkaminnut apeqqutiginiarlugu. Taamaalilluni ilisimatitsissutaavoq peqatiginnittarnissap atorneqarsinnaannginnera.”

Suliami allagaatit allakkatigut 23. december 2020-meersutigut tiguakka, allakkannut 29. oktober 2020-meersunut, kommunimut A-p B-llu uannut naammagittaalliutaat 1. oktober 2020-meersoq tunngavigalugu nassiusannut akissutitut.

Kommuni allakkatigut 28. januar 2021-meersutigut qinnuigeqqippara suliami allagaatit uannut nassiateqqullugit, uangami paasinninnera unaamat suliami allagaatit sorliit kommunimut allakkanni 29. oktober 2020-meersuni qinnutiginerikka kommunip paasisimangikkaa. Ilaatigut makku qinnutigaakka:

“Kommuni qinnuigaara angajoqqaat meeqqaminnik nukarlermik najuisarnerannik 29. september 2020-mi unitsitsinerminik [A]-mut [B]-mullu nalunaarummi assilinera uannut nassiateqqullugu.

[...]

Kommunip suliamik angerlartitsiniarnermut tunngasumik unitsitsinini aamma meeqqamik nukarlermik najuisarnermik unitsitsinini angajoqqaanut aappariiusunut oqaasiinartigut nalunaarutigisimappagu kommuni qinnuigaara aalajangiinerit taakku pillugit allakkiat imaluunniit allattuiffinni allattukkat kommunip aalajangiinerit taakkua pillugit suliarisimasai uannut nassiateqqullugit.

Kommuni allakkianik allattuiffinniluunniit allattukkanik taamaattunik aamma peqanngippat qinnuigaara tamanna pillugu nassuiaateqaqqullugu, kommunip aalajangiinerinik isumalimmik isummerfiginnissinnaajumallunga.”

Suliami allagaatit paasissutissallu kommunimit allakkatigut 9. februar 2021-meersutigut allakkannut 28. januar 2021-meersunut akissutitut tiguakka.

Kommunip uannut allagaanit 9. februar 2021-meersunit ilaatigut makku erserput:

“Angerlartitsiniarneq suliarineqarsinnaaqqullugu angajoqqaat Kommuneqarfik Sermersuumut saaffinneqqullugit Avannaata Kommuniata nassuiaappai. [Illoqarfimmi Y-mi] massakkut najugaqarfik pillugu paasissutissat kiisalu paasissutissat meeqqanik angerlartitsiniarnermik meeqqat tapersorsorneqarnissaannut Inatsisartut inatsisaanni nr. 20-mi, 26. juni 2017-imeersumi § 41 aallaavigalugu suliarinninnermi ilaasut kommunip amigaatigai.” (Ombudsmandeqarfimmi nutsigaavoq)

Naammagittaalliuuteqartarfiup sulisuma ilaannut oqarasuaatikkut 15. april 2021-mi paasissutissiissutigaa kommunip angajoqqaat aappariit paniisa angerlarsi-

maffimmik avataanut inissinneqarnissaannik aalajangiinera 12. juli 2019-imeersoq imaluunniit niuarsiaqqat angerlartinniarneqarnerannik itigartitsinissamik aalajangiinera 18. juli 2020-meersoq A-p B-llu Naammagittaalliuuteqartarfimmut naammagittaalliuutigisimangikkaat.

Naammagittaalliuuteqartarfiup sulisunnut aammattaaq paasissutissiissutigaa aalajangiineq Naammagittaalliuuteqartarfimmut aalajangiinerup tiguneqarneranit sapaatit akunneri arfinillit qaangiutsinnagit naammagittaalliuutigineqarsinnaasoq kommuni paasissutissiisimagaangat naammagittaalliornissamut piffissalioq Naammagittaalliuuteqartarfiup tamanna tungavigalugu naatsorsortaraa. Aalajangiineq piffissap taassuma kingornatigut naammagittaalliuutigineqarpat suliap suliarineqarnissaa Naammagittaalliuuteqartarfiup itigartitsissutigissavaa.

Kommunip tamatumunnga oqaaseqaateqarnissamut periarfissinnissaa siunertaralugu oqaaseqaatigigallagara kommunimut 31. maj 2021-mi nassiuppara.

Kommunip oqaaseqaatigigallakkannut oqaaseqaatai 30. juni 2021-mi tiguakka. Kommunip ilaatigut makku uannut paasissutissiissutigai:

“Najugaqarfiup allangornera eqqarsaatigalugu Avannaata Kommuniata paasissutissiissutigisinnaavaa [A] aamma [B] najugartik allangorteqqullugu kommunimit arlarierlutik qinnuigineqarsimasut, taamaalilluni najugaqarfik Inunnik Nalunaarsuiffimmi pissusiviusut naapertorlugit allassimasinnaaqqullugu. [A] aamma [B] suli taamaaliuningimmata Avannaata Kommunua ulloq 18. marts 2021-mi aalajangiivoq Qitiusumik Inunnik Nalunaarsuiffik (Det Centrale Personregister) pillugu inatsisip atuutilersinneqarnissaanik peqqussut nr. 11, 29. november 2006-imeersoq naapertorlugi najugaqarfiup allangortinneqarnissaanik aalajangiivoq, taamaalilluni najugaqarfik Kommuneqarfik Sermersuumut allangortinneqarluni. Aalajangiineq aammattaaq Kommuneqarfik Sermersuumut nassiunneqarpoq, najugaqarfik eqqortoq ullorlu nuuffiusoq nasaariniaqqullugit qinnuiginnissummik ilaqartumik.

[...]

Tamatuma saniatigut meeqqat inissinneqarnerat angajoqqaallu meeqqanik najuisinnaanerit il.il. pillugit suliame allagaatit tamaasa Avannaata Kommuniata ulloq 23.

marts 2021-mi meeqqat tapersorsorneqarnissaannut Inatsisartut inatsisaanni nr. 20-mi, 26. juni 2017-imeersumi § 17 kiisalu kommunit akunnerminni akiliiffigeqati-giittarnissamut pisussaaffii pillugit Inatsisartut peqqussutaanni nr. 2-mi, 12. juni 1995-imeersumi § 13, imm. 2 naapertorlugit Kommuneqarfik Sermersuumut nassiuppai. Ulloq 23. april 2021-mi Kommuneqarfik Sermersuup suliami allagaatit utertillugit nassiuppai.

Kommuneqarfik Sermersuup tamatumunnga malitsigitillugu allakkani oqaatigaa:

"Kommuneqarfik Sermersuumi Meeqqanut Ilaqtariinnullu Ingerlatsiviup [...] pillugu suliaq matuniarlugu aalajangerpoq, tamatumani tunngavilersuutigalugu angajoqqaatut oqartussaassusermik tigummiartuusut [A] aamma [B] [illoqarfimmi X-imi] najugaqarnerat. Suliami allagaatit [illoqarfimmi X-imi] Meeqqanut Ilaqtareeqarnermullu Ingerlatsivimmit Kommuneqarfik Sermersuumi Meeqqanut Ilaqtariinnullu Ingerlatsivimmut nassiunneqartut matumuuna utertinneqarput.

Ilisimatitsissutigineqassaaq inuusuttoq pillugu paasissutissat kingulliit sapinngisamik piaartumik nassiunneqassammata."

[...]

[A]-p [B]-llu meeqqat angerlartinneqarnissaannik qinnuteqaataat eqqarsaatigalugu qinnuteqaat taanna Avannaata Kommunianit aammattaaq suliarineqarpoq. Avannaata Kommuniata [A]-p [B]-llu ineqarnikkut aningaasaqarnikkullu atugaat, imigassamik atui-nerat il.il. misissorlugit maanna ingerlappai.

Suliamik ingerlatsinermi siusinnerusukkut kukkunerit Avannaata Kommunianit assutajuusaarutigineqarput. Kukkussuteqarnernut ilaatigut pissutaapput sulisut taarseraan-nerat kiisalu [A]-p [B]-llu piffissap ilaani suleqatigiuminaatsorujussuusimanerat paasissutissanillu attuumassuteqartunik pissarsivigiuminaatsorujussuusimanerat."